


韓文六



PL
2670
A1
1854
x 6




韓文卷之三十九

表狀

論捕賊行賞表

臣愈言。臣伏見六月八日勅。以狂賊傷害宰臣。擒捕未獲。陛下悲傷震悼。形於寢食。特降詔書。明立條格云。有能捉獲賊者。賜錢萬貫。仍加超授。今下手賊等。四分之內。已得其三。其餘兩人。蓋不足計。根尋蹤跡。知自承宗。再降明詔。絕其朝請。又與王士則士平等官。八日之制。無不行者。獨有賞錢。尚未賜給。羣情疑惑。未測聖心。聞初載錢置市之日。市中觀者日數萬人。巡繞瞻視。咨嗟歎息。既去復來。以至日暮。百姓小人。重財輕義。不能深達事體。但見不給其



賞便以爲朝廷愛惜此錢不守言信自近傳遠無由辯明
且出賞所以求賊今賊已誅斬若無人捉獲國家何因得
此賊而正刑法也承宗何故而賜誅絕也士則士平何故
與美官也三事旣因獲賊獲賊必有其人不給賞錢實亦
難曉假如聖心獨有所見審知不合加賞其如天下百姓
及後代久遠之人哉況今元濟承宗尚未擒滅兩河之地
太半未收隴右河西皆沒戎狄所宜大明約束使信在言
前號令指麾以圖功利況自陛下卽位已來繼有不績斬
楊惠琳收夏州斬劉闢收劔南東西川斬李錡收江東縛
盧從史收澤潞等五州威德所加兵不汙刃收魏博等六
州致張茂昭張愔收易定徐泗濠等五州創業已來列聖

功德未有能高於陛下者。可謂赫赫巍巍光照前後矣。此由天授陛下神聖英武之德。爲巨唐中興之君。宗廟神靈所共祐助。勉強不已。守之以信。則故地不足收。而太平不難致。如乘快馬行平路。遲速進退。自由其心。有所欲往。無不可者。於此之時。特宜示人以信。孔子欲存信去食。人非食不生。尚欲捨生以存信。況可無故而輕棄也。昔秦孝公用商鞅爲相。欲富國強兵。行令於國。恐人不信。立三丈之木於市南門。募人有能徙置北門者。與五十金。有一人徙之。輒與五十金。秦人以君言爲必信。法令大行。國富兵強。無敵天下。三丈之木非難徙也。徙之非有功也。孝公輒與之金者。所以示其言之必信也。昔周成王尚小。與其弟叔

虞爲戲。削桐葉爲珪。曰以晉封汝。其臣史佚因請擇日立叔虞爲侯。成王曰。吾與之戲耳。史佚曰。天子無戲言。言之則史書之。禮成之。樂歌之。於是遂封叔虞於晉。昔漢高祖出黃金四萬斤與陳平。恣其所爲。不問出入。令謀項羽。平用金間楚數年之間。漢得天下。論者皆言漢高祖深達於利。能以金四萬斤致得天下。以此觀之。自古以來。未有不信其言。而能有大功者。亦未有不費少財。而能收大利者也。臣於告賊之人。本無恩義。彼雖獲賞。了不關臣。所以區區盡言。不避煩黷者。欲令陛下之信行於天下也。伏望恕臣愚陋僻褊之罪。而收其懇款誠至之心。天下之幸。非臣之幸也。謹奉表以聞。臣愈誠惶誠恐。

論佛骨表

臣某言。伏以佛者夷狄之一法耳。自後漢時流入中國。上古未嘗有也。昔者黃帝在位百年。年百一十歲。少昊在位八十年。年百歲。顓頊在位七十九年。年九十八歲。帝嚳在位七十年。年百五歲。帝堯在位九十八年。年百一十八歲。帝舜及禹。年皆百歲。此時天下太平。百姓安樂。壽考。然而中國未有佛也。其後殷湯亦年百歲。湯孫太戊在位七十五年。武丁在位五十九年。書史不言其年壽所極。推其年數。蓋亦俱不減百歲。周文王年九十七歲。武王年九十三歲。穆王在位百年。此時佛法亦未入中國。非因事佛而致然也。漢明帝時始有佛法。明帝在位纔十八年耳。其後亂

亡相繼運祚不長。宋齊梁陳元魏已下。事佛漸謹。年代尤促。惟梁武帝在位四十八年。前後三度捨身施佛。宗廟之祭。不用牲牢。晝日一食。止於菜果。其後竟爲侯景所逼。餓死臺城。國亦尋滅。事佛求福。乃更得禍。由此觀之。佛不足事。亦可知矣。高祖始受隋禪。則議除之。當時羣臣材識不遠。不能深知先王之道。古今之宜。推闡聖明。以救斯弊。其事遂止。臣常恨焉。伏惟睿聖文武皇帝陛下。神聖英武。數千百年已來。未有倫比。卽位之初。卽不許度人爲僧尼道士。又不許創立寺觀。臣常以爲高祖之志。必行於陛下之手。今縱未能卽行。豈可恣之轉令盛也。今聞陛下令羣僧迎佛骨於鳳翔。御樓以觀。昇入大內。又令諸寺遞迎供養。

臣雖至愚必知陛下不惑於佛作此崇奉以祈福祥也直以年豐人樂徇人之心爲京都士庶設詭異之觀戲玩之具耳安有聖明若此而肯信此等事哉然百姓愚冥易惑難曉苟見陛下如此將謂真心事佛皆云天子大聖猶一心敬信百姓何人豈合更惜身命焚頂燒指百十爲羣解衣散錢自朝至暮轉相倣效惟恐後時老少奔波棄其業次若不卽加禁遏更歷諸寺必有斷臂癰身以爲供養者傷風敗俗傳笑四方非細事也夫佛本夷狄之人與中國言語不通衣服殊製口不言先王之法言身不服先王之法服不知君臣之義父子之情假如其身至今尚在奉其國命來朝京師陛下容而接之不過宣政一見禮賓一設

賜衣一襲衛而出之於境不令惑衆也況其身死已久枯朽之骨凶穢之餘豈宜令入宮禁孔子曰敬鬼神而遠之古之諸侯行弔於其國尚令巫祝先以桃茢祓除不祥然後進弔今無故取朽穢之物親臨觀之巫祝不先桃茢不用羣臣不言其非御史不舉其失臣實耻之乞以此骨付之有司投諸水火永絕根本斷天下之疑絕後代之惑使天下之人知大聖人之所作爲出於尋常萬萬也豈不盛哉豈不快哉佛如有靈能作禍祟凡有殃咎宜加臣身上天鑒臨臣不怨悔無任感激懇悃之至謹奉表以聞臣某誠惶誠恐

潮州刺史謝上表

臣某言。臣以狂妄驚愚。不識禮度。上表陳佛骨事。言涉不敬。正名定罪。萬死猶輕。陛下哀臣愚忠。恕臣狂直。謂臣言雖可罪。心亦無他。特屈刑章。以臣爲潮州刺史。旣免刑誅。又獲祿食。聖恩弘大。天地莫量。破腦剗心。豈足爲謝。臣某誠惶誠恐。頓首頓首。臣以正月十四日。蒙恩除潮州刺史。卽日奔馳上道。經涉嶺海。水陸萬里。以今月二十五日。到州上訖。與官吏百姓等相見。具言朝廷治平。天子神聖。威武慈仁。子養億兆人庶。無有親疎遠邇。雖在萬里之外。嶺海之陬。待之一如畿甸之間。輦轂之下。有善必聞。有惡必見。早朝晚罷。兢兢業業。惟恐四海之內。天地之中。一物不得其所。故遣刺史。面問百姓疾苦。苟有不便。得以上陳。國

家憲章完具爲治日久守令承奉詔條違犯者鮮雖在蠻
荒無不安泰聞臣所稱聖德惟知鼓舞謹呼不勞施爲坐
以無事臣某誠惶誠恐頓首頓首臣所領州在廣府極東
界上去廣府雖云纔二千里然來往動皆經月過海口下
惡水濤瀧雙音壯猛難計程期颶風鰐魚患禍不測州南近
界漲海連天毒霧瘴氣日夕發作臣少多病年纔五十髮
白齒落理不久長加以罪犯至重所處又極遠惡憂惶慚
悸死亡無日單立一身朝無親黨居蠻夷之地與魑魅爲
羣苟非陛下哀而念之誰肯爲臣言者臣受性愚陋人事
多所不通惟酷好學問文章未嘗一日暫廢實爲時輩所
見推許臣於當時之文亦未有過人者至於論述陛下功

德與詩書相表裏。作爲歌詩。薦之郊廟。紀泰山之封。鏤白
玉之牒。鋪張對天之閱。休揚厲無前之偉蹟。編之乎詩書
之策。而無愧措之乎天地之間。而無虧雖使古人復生。臣
亦未肯多讓。伏以大唐受命有天下。四海之內。莫不臣妾。
南北東西。地各萬里。自天寶之後。政治少懈。文致未優。武
剋不剛。孽臣姦隸。蠹居碁處。搖毒自防。外順內悖。父死子
代。以祖以孫。如古諸侯。自擅其地。不貢不朝。六七十。年。四
聖傳序。以至陛下。陛下卽位以來。躬親聽斷。旋乾轉坤。關
機闔開。雷厲風飛。日月清照。天戈所麾。莫不寧順。大宇之
下。生息理極。高祖創制天下。其功大矣。而治未太平也。太
宗太平矣。而大功所立。咸在高祖之代。非如陛下承天寶

之後接因循之餘六七十年之外赫然興起南面指麾而致此巍巍之治功也宜定樂章以告神明東巡泰山奏功皇天具著顯庸明示得意使永永年代服我成烈當此之際所謂千載一時不可逢之嘉會而臣負罪嬰豐自拘海島戚戚嗟嗟日與死迫曾不得奏薄伎於從官之內隸御之間窮思畢精以贖罪過懷痛窮天死不閉目瞻望宸極魂神飛去伏惟皇帝陛下天地父母哀而憐之無任感恩戀闕慚惶懇迫之至謹附表陳謝以聞

賀冊尊號表

臣某言臣伏聞宰相公卿百官及關輔百姓耆耄等以陛下功崇德鉅天成地平宜加號於殊常以昭示於來代陳

請懇至于再于三。陛下仰稽乾符，俯順人志，乃以新秋首序。令月吉辰，發揚鴻休，膺受顯冊。天人合慶，日月揚光。環海之間，含生之類，歡欣踊躍，以歌以舞。臣某誠歡誠喜，頓首頓首。臣聞體仁長人之謂元，發而中節之謂和，無所不通之謂聖，妙而無方之謂神。經緯天地之謂文，戡定禍亂之謂武。先天不違之謂法天，道濟天下之謂應道。伏惟元和聖文神武法天應道皇帝陛下，子育億兆，視之如傷，可謂體仁以長人矣。喜怒以類，刑賞不差，可謂發而中節矣。明照無私，幽隱畢達，可謂無所不通矣。發號出令，雲行雨施，可謂妙而無方矣。三光順軌，草木遂長，可謂經緯天地矣。除剗寇盜，宇縣清夷，可謂戡定禍亂矣。風雨以時，祥瑞

輻湊可謂先天而天不違矣。國內無饑寒，四夷皆朝貢，可謂道濟天下矣。衆美備具，名實相當，赫赫巍巍，超今冠古。方當議明堂辟雍之事，撰泰山梁父之儀，按三代之逸禮，補百王之漏典。時乘六龍，肆覲東后，微臣幸生聖代，觸犯刑章，假息海隅，死亡無日，瞻望宸極，心魂飛揚，有永棄之悲，無自新之望，曾不得與鳥獸率舞，蠻夷縱觀爲比。銜酸抱痛，且耻且慚，無任感恩戀闕，懇迫彷徨之至。謹奉表陳賀以聞。

袁州刺史謝上表

臣某言。臣以去年正月上疏論佛骨事，先朝恕臣愚直，不加大罪，自刑部侍郎貶授潮州刺史。伏遇其年七月十三

日恩赦至其年十月二十四日准例量移改授袁州刺史以今月八日到任上訖臣某誠歡誠喜頓首頓首伏以州小地狹稅賦及時人安吏循閭里無事微臣惟當布陛下惟新之澤守國家承平之規勸以耕桑使無怠惰而已臣以愚陋無堪累蒙朝廷獎用掌誥西掖司刑南宮顯榮頻煩稱效寂蔑又蒙赦其罪累授以方州德重恩弘身微命賤無階荅謝惟積慚惶無任感恩慚惕之至謹差軍事副將郝泰奉表陳謝以聞

賀皇帝卽位表

臣某言伏聞皇帝陛下以閏正月二日虔奉遺詔昭升大位天地神祇永有依歸華夏蠻貊永有承事神人交慶日

月貞明。臣某誠歡誠喜頓首頓首。臣聞王者必爲天所相。爲人所歸。上符天心。下合人志。然後奄有四海。以君萬邦。伏惟皇帝陛下。承列聖之不續。當中興之昌運。爰自主鬯。春宮。齒胄國學。孝友之美。實形四方。英偉之姿。久動羣聽。及初嗣位。遐邇莫不歡心。爰降詔書。老幼或至垂泣。舉用俊乂。流竄姦邪。雖虞舜之去四兇。舉十六相。不能過也。天下翹首。以望太平。天下傾心。以觀至化。臣某誠歡誠喜頓首頓首。臣聞昔者堯舜以吁嗟君臣相戒。以致至治。周文王以憂勤日中不食。以和萬民。故能澤流無窮。名配日月。伏惟皇帝陛下。儀而象之。以永多福。天下幸甚。天下幸甚。微臣往因言事。得罪先朝。守郡遠方。拘限條制。不獲奔走。

稱慶闕庭。無任欣歡。踴躍感恩。戀闕之至。謹奉表以聞。

賀赦表

臣某言。伏奉二月五日制書。大赦天下。常赦所不原者。咸蒙除罪。與之更始。令得自新。恩浹幽明。慶溢寰海。臣某誠歡誠喜。頓首頓首。臣聞王者必於嗣位之始。降非常之恩。所以象德乾坤。同明日月。伏惟皇帝陛下。文思聰明。聖神睿哲。發號出令。雲行雨施。懼刑政之或差。憐鰥寡之重困。知事久之滋弊。慮法詭之益姦。罪人悉原。墜典咸舉。生恩既及於四海。和氣遂充於八紘。臣某誠歡誠喜。頓首頓首。微臣往因論事。獲譴海隅。旋沐朝獎。待罪山郡。未離貶竄之地。忽逢曠蕩之恩。踴躍欣歡。實倍常品。限以官守。不獲

隨例稱慶闕廷無任感恩戀闕之至謹奉表陳賀以聞

賀冊皇太后表

臣某言伏承閏正月二十七日皇太后光膺令典受冊宮闈歡心始自於內朝孝理遂形於寰海臣某誠歡誠喜頓首頓首皇太后夙贊先皇弼成至化誕生明聖續繼鴻休華胥實贊於軒圖文母有光於周道恭惟懿德克配前芳皇帝陛下出震承乾垂衣御極式展臣子之志以明教化之源禮命載崇華夷同慶臣待罪外郡不獲隨例稱賀闕廷無任踊躍欣歡之至謹奉表陳賀以聞

賀慶雲表

臣某言臣所領州今月十六日申時有慶雲見於西北至

暮方散。臣及舉州官吏百姓等無不見者。五采五色光華不可徧觀。非煙非雲容狀詎能詳述。抱日增麗。浮空不收。旣變化而無窮。亦卷舒而莫定。斯爲上瑞。實應太平。臣某誠歡誠喜。頓首頓首。謹按沈約宋書云。慶雲五色者太平之應。又據孝經援神契曰。王者德至山陵則慶雲出。故黃帝因之以紀事。虞舜由之而作歌。又按季夏六月土王用事。其日景戌亦主於土。西北方者京師所在。土爲國家之德。祥見京師之位。旣徵於古。又驗於今。伏惟皇帝陛下德合覆載。道光軒虞。嗣位之初。禎祥繼至。昇平之符旣兆。仁壽之域以躋。微臣徃在先朝。以論事得罪。身居貶黜之地。目覩殊常之慶。抃躍欣幸。實倍常情。伏乞宣付史官。以彰

聖德所致。瞻戀闕廷。心魂飛馳。無任欣抃踊躍之至。謹差某官奉表陳賀以聞。

舉張惟素自代狀 國子監

中散大夫守左散騎常侍上柱國賜紫金魚袋張惟素右伏準建中元年正月五日制。常參官上後三日。舉一人自代者。前件官文學治行。衆所推與。累歷中外。資序已深。和而不同。靜而有守。敦厚退讓。可以訓人。臣所不如。輒舉自代。謹錄奏聞。

舉韓泰自代狀 袁州

使持節漳州諸軍事守漳州刺史韓泰

右伏準建中元年正月五日制。常參官及刺史授上訖三

日內舉一人自代者。前件官詞學優長才器端實早登科第亦更臺省。往因過犯貶黜至今十五餘年。自領漳州悉心爲治。官吏懲懼不敢爲非。百姓安寧。並得其所。臣在潮州之日。與其州界相接。臣之政事遠所不如。乞以代臣。庶爲允當。謹錄奏聞。

慰國哀表

臣某言。伏奉正月二十七日詔書。大行皇帝奄棄萬國。承詔哀惶。號踊無地。伏惟聖情何可堪處。大行皇帝功濟寰區。仁霑動植。奉諱之日。率土崩心。凡在臣子。不勝殞裂。伏惟陛下痛貫宸極。聖情難居。臣拘守遠郡。不獲匍匐奉慰。瞻望闕廷。且悲且戀。謹奉表陳慰以聞。

舉薦張籍狀

登仕郎守祕書省校書郎張籍

右件官學有師法文多古風沈默靜退介然自守聲華行實光映儒林臣當司見闕國子監博士一員生徒藉其訓導伏乞天恩特授此官以彰聖朝崇儒尚德之道謹錄奏聞伏聽勅旨

請上尊號表

臣某言臣得所管國子太學廣文四門及書算律等七館學生沈周封等六百人狀稱身雖賤微然皆以選擇得備學生讀六藝之文脩先王之道粗有知識皆由上恩今天子整齊乾坤出入神聖經營乎無爲之業游息乎混元之

宮不謀於廷。不戰於野。坐收冀部。旋定幽都。析木天街。星宿清潤。北嶽醫閭。神鬼受職。地彌天區。界軼海外。舜之十有二州。周之千七百國。章亥所步。禹契所書。四面輻輳。各脩貢職。西戎之首。北虜之渠。怛威愧德。矢據狼狽。收其種落。逃遁遠去。來獻羊馬。千里不絕。功旣如此。德又如彼。爰初嗣位。首去姦孽。隨所顧指。應時清寧。哀天下之鰥寡。釋四海之鬱結。左右前後。莫非俊良。小大之材。咸盡其用。無所誅詰。一和以仁。由是五穀歲登。百瑞時見。六府三事。惟序惟歌。昔者媧皇殺黑龍。以濟冀州。堯誅九嬰。以定下土。血兵剗刃。僅就厥功。以方吾君。一何遠也。堯之在位。七十餘載。戒飭咨嗟。以致平治。孔子之聖。自云三年有成。今自

嗣位以來。歲有餘耳。臻此功德。其何捷哉。置郵傳命。未足以諭。以非常之功。襲尋常之號。以冠古之美。屈守文之名。臣子之誠。闕而不奏。天號人稱。不滿事實。斯亦縉紳先生之過也。謂臣官居師長。不言謂何。考其所陳。中於義理。天人合願。不謀而同。非臣之愚。所敢隱蔽。輒冒死以聞。伏乞天恩。特允誠志。令公卿大夫得竭思慮。取正於經。以定大號。有司備禮。擇日以頒。天下幸甚。臣某誠惶誠恐。

舉韋顗自代狀 尚書兵部

中散大夫守大理少卿驍騎尉韋顗

右伏準建中元年正月五日制。常參官。上後三日。舉一人。

自代者前件官學識該達器量弘深朝推直道代仰清節
顯映班序十五年餘夷險一致風猷益茂屈居少列未副
羣情文昌政本侍郎官重尚德之舉顗宜當之乞廻臣所
授庶弭官謗謹錄奏聞謹奏

韓文卷之三十九終

韓文卷之四十

表狀

論孔戣致仕狀

某官某

右臣與孔戣同在南省爲官數得相見戣爲人守節清苦
議論平正今年纔七十筋力耳目未覺衰老憂國忘家用
意深遠所謂朝之耆德老成人者臣知戣上疏求致仕故
往看戣戣爲臣言已蒙聖主允許伏以陛下優賢尚齒見
戣頻上三疏言詞懇到重違其意遂即許之此誠陛下仁
德之至然如戣輩在朝不過三數人實可爲國愛惜自古
以來及聖朝故事年雖八九十但視聽心慮苟未昏錯尚

可顧問委以事者。雖求退罷。無不殷勤留止。優以祿秩。不聽其去。以明人君貪賢敬老之道也。禮大夫七十而致事。若不得謝。則必賜之几杖安車。七十求退。人臣之常禮。若有德及氣力尚壯。則君優而留之。不必年過七十盡許致事也。詩曰。雖無老成人。尚有典刑。此言老成人重於典刑。不可不惜而留也。今殘幸無疾疹。但以年當致事。據禮求退。陛下若不聽許。亦無傷於義。而有貪賢之美。況左丞職事亦極清簡。若殘尚以繁要爲辭。自可別授秩崇而務少者。今中外之臣。有年過於殘。尚未得退。殘獨何人得遂其願。然人皆求進。殘獨求退。尤可賢重。臣所領官。無事不敢請對。蒙陛下厚恩。苟有所見。不敢不言。伏望

聖恩特垂察納。

舉馬摠自代狀 京兆府

銀青光祿大夫檢校尚書右僕射兼戶部尚書馬摠
右伏準建中元年正月五日制常參官上後三日舉一人
自代者伏以近者京尹用人稍輕所以市井之間盜賊未
斷郊野之外疲瘵尚多前件官文武兼資寬猛得所累更
方鎮皆有功能若以代臣實爲至當謹錄奏聞謹奏。

賀雨表

臣某言臣聞聖人之德與天地通誠發於中事應於外始
聞其語今見其真臣誠歡誠喜頓首頓首伏以季夏以來
雨澤不降臣職司京邑祈禱實頻青天湛然旱氣轉甚陛

下憫茲黎庶有事山川中使纔出於九門陰雲已垂於四野龍神效職雷雨應期嘉穀奮興根葉肥潤抽莖展穗不失時宜人和年豐莫大之慶微臣幸蒙寵任獲覩殊祥慶抃歡呼倍於常品無任踴躍之至謹奉表陳賀以聞

賀太陽不虧狀

司天臺奏今日辰卯間太陽合虧陛下敬畏天命克已

右司天臺奏今日辰卯間太陽合虧陛下敬畏天命克已脩身誠發於中災銷於上自卯及巳當虧不虧雖隔陰雲轉更明朗比於常日不覺有殊天且不違慶孰爲大臣官忝京尹親覩殊祥欣感之誠實倍常品謹奉狀賀以聞

舉張正甫自代狀 尚書兵部

通議大夫守右散騎常侍上柱國南陽縣開國子食邑
五百戶賜紫金魚袋張正甫

右臣蒙恩除尚書兵部侍郎伏準建中元年正月五日制
常參官上後三日舉一人自代者前件官稟正直之性懷
剛毅之姿嫉惡如仇讎見善若饑渴備更內外灼有名聲
年齒雖高氣力逾勵甘貧苦節不愧神明可謂古之老成
朝之碩德久處散地實非所宜乞以代臣以副公望

袁州申使狀

使司牒州牒

右自今月二日後每奉公牒牒尾故牒字皆爲謹牒字有
異於常初不敢陳論以爲錯誤今旣頻奉文牒前後並同

在愈不勝戰懼之至。伏乞仁恩特令改就常式以安下情。

國子監論新注學官牒

國子監。應今新注學官等牒。準今年赦文。委國子祭酒。選擇有經藝堪訓導生徒者。以充學官。近年吏部所注。多循資序。不考藝能。至令生徒不自勸勵。伏請非專通經傳。博涉墳史。及進士五經諸色登科人。不以比擬。其新受官。上日。必加研試。然後放行。上副聖朝崇儒尚學之意。具狀牒上吏部。仍牒監者。謹牒。

黃家賊事宜狀

一臣去年貶嶺外刺史。其州雖與黃家賊不相鄰接。然見往來過客。并諳知嶺外事。人所說至精至熟。其賊並是夷

獠亦無城郭可居依山傍險自稱洞主衣服言語都不似人尋常亦各營生急則屯聚相保比緣邕管經略使多不得人德旣不能綏懷威又不能臨制侵欺虜縛以致怨恨蠻夷之性易動難安遂至攻劫州縣侵暴平人或復私讎或貪小利或聚或散終亦不能爲事近者征討本起於裴行立陽旻此兩人者本無遠慮深謀意在邀功求賞亦緣見賊未屯聚之時將謂單弱立可摧破爭獻謀計惟恐後時朝廷信之遂允其請自用兵已來已經二年前後所奏殺獲計不下一二萬人儻皆非虛賊已尋盡至今賊猶依舊足明欺罔朝廷邕容兩管因此凋弊殺傷疾患十室九空百姓怨嗟如出一口陽旻行立相繼身亡實由自邀功

賞造作兵端人神共嫉以致殃咎陽旻行立事旣已往今所用嚴公素者亦非撫御之才不能別立規模依前還請攻討如此不已臣恐嶺南一道未有寧息之時

一昨者併邕容兩管爲一道深合事宜然邕州與賊逼近容州則甚懸隔其經略使若置在邕州與賊隔江對岸兵鎮所處物力必全一則不敢輕有侵犯一則易爲逐便控制今置在容州則邕州兵馬必少賊見勢弱易生姦心伏請移經略使於邕州其容州但置刺史實爲至便

一比者所發諸道南討兵馬例皆不諳山川不伏水土遠鄉羈旅疾疫殺傷臣自南來見說江西所發共四百人曾未一年其所存者數不滿百岳鄂所發都三百人其所存

者四分纔一。續添續死。每發倍難。若令於邕容側近召募。添置千人。便割諸道見供行營人數糧賜。均融充給。所費既不增加。而兵士又皆便習。長有守備。不同客軍。守則有威。攻則有利。

一自南討已來。賊徒亦甚傷損。察其情理。厭苦必深。大抵嶺南人稀地廣。賊之所處。又更荒僻。假如盡殺其人。盡得其地。在於國計。不爲有益。容貸羈縻。比之禽獸。來則捍禦。去則不追。亦未虧損朝廷事勢。以臣之愚。若因改元大慶。赦其罪戾。遣一郎官御史。親往宣諭。必望風降伏。謹呼聽命。仍爲擇選有材用威信。諳嶺南事者。爲經略使。處理得宜。自然永無侵叛之事。

應所在典貼良人男女等狀

應所在典貼良人男女等

右準律不許典貼良人男女作奴婢驅使臣往任袁州刺史日檢責州界內得七百三十一人竝是良人男女準律計傭折直一時放免原其本末或因水旱不熟或因公私債負遂相典貼漸以成風名目雖殊奴婢不別鞭笞役使至死乃休旣乖律文實虧政理袁州至小尚有七百餘人天下諸州其數固當不少今因大慶伏乞令有司重舉舊章一皆放免仍勒長吏嚴加檢責如有隱漏必重科懲則四海蒼生孰不感荷聖德以前件如前謹具奏聞伏聽勅旨

論淮西事宜狀

右臣伏以淮西三州之地。自少陽疾病。去年春夏已來。圖爲今日之事。有職位者。勞於計慮。撫循奉所役者。修其器械。防守金帛糧畜。耗於賞給。執兵之卒。四向侵掠。農夫織婦。攜持幼弱。餉於其後。雖時侵掠。小有所得力。盡筋疲。不償其費。又聞畜馬甚多。自半年已來。皆上槽櫪。譬如有人。雖有十夫之力。自朝及夕。常自大呼跳躍。初雖可畏。其勢不久。必自委頓。乘其力衰。三尺童子。可使制其死命。況以三小州殘弊困劇之餘。而當天下之全力。其破敗可立而待也。然所未可知者。在陛下斷與不斷耳。夫兵不多。不足以必勝。必勝之師。必在速戰。兵多而戰不速。則所費必廣。

兩界之間。疆場之上。日相攻劫。必有殺傷。近賊州縣。徵役百端。農夫織婦。不得安業。或時小遇水旱。百姓愁苦。當此之時。則人人異議。以惑陛下之聽。陛下持之不堅。半途而罷。傷威損費。爲弊必深。所以要先決於心。詳度本末。事至不惑。然可圖功。爲統帥者。盡力行之於前。而參謀議者。盡心奉之於後。內外相應。其功乃成。昔者殷高宗大聖之主也。以天子之威。伐背叛之國。三年乃剋。不以爲遲。志在立功。不計所費。傳曰。斷而後行。鬼神避之。遲疑不斷。未有能成其事者也。臣謬承恩寵。獲掌綸誥。地親職重。不同庶寮。輒竭愚誠。以效裨補。謹條次平賊事宜。一二如後。

一諸道發兵。或二三千人。勢力單弱。羈旅異鄉。與賊不相

諳委望風懾懼難便前進所在將帥以其客兵難處使先
不存優恤待之既薄使之又苦或被分割隊伍隸屬諸頭
士卒本將一朝相失心孤意怯難以有功又其本軍各湏
資遣道路遼遠勞費倍多士卒有征行之艱閭里懷離別
之思今聞陳許安唐汝壽等州與賊界連接處村落百姓
悉有兵器小小俘刼皆能自防習於戰鬪識賊深淺既是
土人護惜鄉里比來未有處分猶願自備衣糧共相保聚
以備寇賊若令召募立可成軍若要添兵自可取足賊平
之後易使歸農伏請諸道先所追到行營者悉令却牒歸
本道據行營所追人額器械弓矢一物已上悉送行營充
給所召募人兵數既足加之教練三數月後諸道客軍一

切可罷比之徵發遠人利害懸隔。

一繞逆賊州縣堡柵等各置兵馬都數雖多每處則至少。又相去濶遠難相應接所以數被攻劫致有損傷。今若分爲四道每道各置三萬人擇要害地屯聚一處使有隱然之望。審量事勢乘時逐利可入則四道一時俱發使其狼狽驚惶首尾不相救濟。若未可入則深壁高壘以逸待勞。自然不要諸處多置防備。臨賊小縣可收百姓於便地。作行縣以主領之使免散失。

一蔡州士卒爲元濟迫脅勢不得已遂與王師交戰。原其本根皆是國家百姓進退皆死誠可閔傷。宜明勅諸軍使深知此意。當戰鬪之際固當以盡敵爲心。若形勢已窮不

能爲惡者。不須過有殺戮。喻以聖德。放之使歸。銷其兇悖之心。貸以生全之幸。自然相率。棄逆歸順。

一論語曰。欲速則不達。見小利則大事不成。比來征討無功。皆由欲其速捷。有司計筭所費。苟務因循。小不如意。即求休罷。河北淮西等。見承前事勢。知國家必不與之持久。併力苦戰。幸其一勝。即希冀恩赦。朝廷無至忠憂國之人。不惜傷損威重。因其有請。便議罷兵。往日之事。患皆然也。臣愚以爲淮西三小州之地。元濟又甚庸愚。而陛下以聖明英武之資。用四海九州之力。除此小寇。難易可知。太山壓卵。未足爲喻。

一兵之勝負。實在賞罰。賞厚可令廉士動心。罰重可令凶

人喪魄然可集事不可愛惜所費憚於行刑。

一淄青恒冀兩道與蔡州氣類略同今聞討伐元濟人情必有救助之意然皆闇弱自保無暇虛張聲勢則必有之至於分兵出界公然爲惡亦必不敢宜特下詔云蔡州自吳少誠已來相承爲節度使亦微有功效少陽之歿朕亦本擬與元濟恐其年少未能理事所以未便處置待其稍能緝綏然擬或作後許其承繼今忽自爲狂勃或作悻侵掠不受朝命事不得已所以有此討伐至如淄青恒州范陽等道祖父各有功業相承命節年歲已久朕必不利其土地輕有改易各宜自安如妄自疑懼敢相扇動朕即赦元濟不問廻軍討之自然破膽不敢妄有異說。

以前件謹錄奏聞。伏乞天恩特賜裁擇。謹奏。

論變鹽法事宜狀

張平叔所奏鹽法條件

右奉勅將變鹽法事。貴精詳。宜令臣等各陳利害。可否聞奏者。平叔所上變法條件。臣終始詳度。恐不可施行。各隨本條分析利害如後。

一件。平叔請令州府差人自糶官鹽。收實估匹段。省司準舊例支用。自然獲利一倍已上者。臣今通計所在百姓貧多富少。除城郭外。有見錢糶鹽者。十無二三。多用雜物及米穀博易鹽商。利歸於已。無物不取。或從賒貸升斗。約以時熟填還。用此取濟。兩得利便。今令州縣人吏坐鋪自糶。

利不關已罪則加身不得見錢及頭段物恐失官利必不敢糶變法之後百姓貧者無從得鹽而食矣求利未得歛怨已多自然坐失鹽利常數所云獲利一倍臣所未見

一件平叔又請鄉村去州縣遠處令所由將鹽就村糶易不得令百姓闕鹽者臣以爲鄉村遠處或三家五家山谷居住不可令人吏將鹽家至戶到多將則糶貨不盡少將則得錢無多計其往來自充糧食不足比來商人或自負擔斗石往與百姓博易所冀平價之上利得三錢兩錢不比所由爲官所使到村之後必索百姓供應所利至少爲弊則多此又不可行者也

一件平叔云所務至重湏令廟堂宰相充使臣以爲若法

可行。不假令宰相充使。若不可行。雖宰相爲使無益也。又宰相者。所以臨察百司。考其殿最。若自爲使。縱有敗闕。遣誰舉之。此又不可者也。

一件。平叔又云。法行之後。停減鹽司。所由糧課。年可收錢十萬貫。臣以爲變法之後。弊隨事生。尚恐不登常數。安得更望贏利。

一件。平叔欲令府縣糶鹽。每月更加京兆尹料錢百千。司錄及兩縣令。每月各加五十千。其餘觀察及諸州刺史縣令。錄事參軍。多至每月五十千。少至五千三千者。臣今計此用錢已多。其餘官典及巡察手力。所由等糧課。仍不在此數。通計所給。每歲不下十萬貫。未見其利。所費已廣。平

叙又云。停鹽司諸色所由糧課。約每歲合減得十萬貫錢。今臣計其新法。亦用十萬。不啻減得十萬。却用十萬。所亡所得。一無贏餘也。平叙又請以糴鹽多少爲刺史縣令殿最。多者遷轉。不拘常例。如闕課利。依條科責者。刺史縣令職在分憂。今惟以鹽利多少爲之升黜。不復考其治行。非唐虞三載考績黜陟幽明之義也。

一件。平叙請定鹽價。每斤三十文。又每二百里。每斤價加收二文。以充脚價。量地遠近。險易。加至六文。脚價不足。官與出名。爲每斤三十文。其實已三十六文也。今鹽價京師每斤四十。諸州則不登此。變法之後。祇校數文於百姓。未有厚利也。脚價用五文者。官與出二文。用十文者。官與出

四文是鹽一斤官糶得錢名爲三十其實斤多得二十八少得二十六文折長補短每斤收錢不過二十六七百姓折長補短每斤用錢三十四則是公私之間每斤常失七八文也下不及百姓上不歸官家積數至多不可遽筭以此言之不爲有益平叔又請令所在及農隙時併召車牛般鹽送納都倉不得令有闕絕者州縣和雇車牛百姓必無情願事須差配然付脚錢百姓將車載鹽所由先皆無檢齊集之後始得載鹽及至院監請受又須待其輪次不用門戶皆被停留輸納之時人事又別凡事和雇無不皆然百姓寧爲私家載物取錢五文不爲官家載物取十文錢也不和雇則無可載鹽和雇則害及百姓此又不可也

一件平叔稱停減鹽務所由收其糧課一歲尚得十萬貫
文今又稱既有巡院請量閑劇留官吏於倉場勾當要害
守捉少置人數優恤糧料嚴加把捉如有漏失私糶等並
準條處分者平叔所管鹽務所由人數有幾量留之外收
其糧課一歲尚得十萬貫此又不近理也比來要害守捉
人數至多尚有漏失私糶之弊今又減置人數謂能私鹽
斷絕此又於理不可也

一件平叔云變法之後歲計必有所餘日用還恐不足謂
一年已來且未責以課利後必數倍校多者此又不可方
今國用常言不足若一歲頓闕課利爲害已深雖云明年
校多豈可懸保此又非公私蓄積尚少之時可行者也

一件平叔又云浮寄姦猾者轉富土著守業者日貧若官自糴鹽不問貴賤貧富士農工商道士僧尼并兼游惰因其所食盡輸官錢并諸道軍諸使家口親族遞相影占不曾輸稅若官自糴鹽此輩無一人遺漏者臣以此數色人等官未自糴鹽之時從來糴鹽而食不待官自糴然後食鹽也若官不自糴鹽此色人等不糴鹽而食官自糴鹽即糴而食之則信如平叔所言矣若官自糴與不自糴皆常糴鹽而食則今官自糴亦無利也所謂知其一而不知其二見其近而不見其遠也國家榷鹽糴與商人商人納榷糴與百姓則是天下百姓無貧富貴賤皆已輸錢於官矣不必與國家交手付錢然後爲輸錢於官也

一件平叔云初定兩稅時絹一匹直錢三千今絹一匹直錢八百百姓貧虛或先取粟麥價及至收穫悉以還債又充官稅顆粒不殘若官中糴鹽一家五口所食鹽價不過十錢隨日而輸不勞驅遣則必無舉債逃亡之患者臣以爲百姓困弊不皆爲鹽價貴也今官自糴鹽與依舊令商人糴其價貴賤所校無多通計一家五口所食之鹽平叔所計一日以十錢爲率一月當用錢三百是則三日食鹽一斤一月率當十斤新法實價與舊每斤不校三四錢以下通計五口之家以平叔所約之法計之賤於舊價日校一錢月校三十不滿五口之家所校更少然則改用新法百姓亦未免窮困流散也初定稅時一匹絹三千今只八

百。假如特變鹽法。絹價亦未肯貴。五口之家。因變鹽法。日得一錢之利。豈能便免作債收穫之時。不被徵索。輸官稅。後有贏餘也。以臣所見。百姓困弊日久。不以事擾之。自然漸校。不在變鹽法也。今絹一匹八百。百姓尚多寒無衣者。若使匹直三千。則無衣者必更衆多。況絹之貴賤。皆不緣鹽法。以此言之。鹽法未要變也。

一件。平叔云。每州糴鹽不少。長吏或有不親公事。所由浮詞云。當界無人糴鹽。臣即請差清強巡官。檢責所在實戶。據口團保。給一年鹽。使其四季輸納鹽價。口多糴少。及鹽價遲違。請停觀察使見任。改散慢官。其刺史已下。貶與上佐。其餘官貶遠處者。平叔本請官自糴鹽。以寬百姓。令

其蘇息免更流亡。今令責實戶口團保給鹽。令其隨季輸納鹽價。所謂擾而困之。非前意也。百姓貧家食鹽至少。或有淡食動經旬月。若據口給鹽。依時徵價。辦與不辦。並須納錢。遲違及違條件。觀察使已下各加罪譴。苟官吏畏罪必用威刑。臣恐因此所在不安。百姓轉致流散。此又不可之大者也。

一件平叔請限商人鹽納官後不得輒於諸軍諸使覓職掌。把錢捉店看守莊礎。午對切以求影庇。請令所在官吏嚴加防察。如有違犯。應有資財。並令納官。仍牒送府縣充所由者。臣以爲鹽商納推爲官糶鹽。子父相承。坐受厚利。比之百姓。實則校優。今旣奪其業。又禁不得求覓職事。及爲

人把錢捉店。看守莊礎。不知何罪。一朝窮蹙之也。若必行此。則富商大賈。必生怨恨。或收市重寶。逃入反側之地。以資寇盜。此又不可不慮也。

一件。平叔云。行此策後。兩市軍人富商大賈。或行財賄邀截。喧訴。請令所由切加收捉。如獲頭首。所在決殺。連狀聚衆人等。各決脊杖二十。檢責軍司軍戶鹽。如有隱漏。並準府縣例科決。并賞所由告人者。此一件。若果行之。不惟大失人心。兼亦驚動遠近。不知糶鹽所獲幾何。而害人蠹政。其弊實甚。

以前件狀。奉今月九日勅。令臣等各陳利害者。謹錄奏聞。伏聽勅旨。

韓文卷之四十終

韓文外集卷之一

明水賦

古者聖人之制祭祀也。必主忠敬。崇古蠲不貴其豐。乃或薦之以水。不可以黷。斯用致之於天。其事信美。其義惟玄。月實水精。故求其本也。明爲君德。因取以名焉。於是命烜音毀氏候清夜。或將祀圓丘於玄冬。或將祭方澤於朱夏。持鑑而精氣旁射。照月而陰靈潛下。視而不見。謂合道於希夷。挹之則盈。方同功於造化。應於有生。於無。形象未分。徒騁離婁之目光華。暗至如還合浦之珠。旣齊芳於酒醴。詎比賤於潢汚。明德惟馨。玄功不宰。于以表誠潔。于以戒荒怠。苟失其道。殺牛之祭何爲。如得其宜。明水之薦斯在不

引而自致。不行而善至。雖辭翹藥之名。實處罇壘之器。降
於圓魄。殊匪金莖之露。出自方諸。乍似鮫人之淚。將以贊
于陰德。配夫陽燧。夜寂天清。煙消氣明。桂華吐耀。兔影騰
精。聊設監以取水。伊不注而能盈。霏然而象的。爾而呈始。
漠漠而霜積。漸微微而浪生。豈不以德協于坎。同類則感。
形藏在空。氣應則通。鶴鳴在陰之理。不謬。虎嘯于谷之義。
可崇。足以驗聖賢之無黨。知天地之至公。竊比大羹之遺
味。幸希薦於廟中。

芍藥歌

丈人庭中開好花。更無凡木爭春華。翠莖紅藥天力與。此
恩不屬黃鍾家。溫馨熟美鮮香起。似笑無言習君子。霜刀

翦汝天女勞。何事低頭學桃李。嬌癡婢子無靈性。競挽春衫來比並。欲將雙頰一睇紅。綠窗磨徧青銅鏡。一罇春酒甘若飴。丈人此樂無人知。花前醉倒歌者誰。楚狂小子韓退之。

海水

海水非不廣。鄧林豈無枝。風波一蕩薄。魚鳥不可依。海水饒大波。鄧林多驚風。豈無魚與鳥。巨細各不同。海有吞舟鯨。鄧有垂天鵬。苟非鱗羽大。蕩薄不可能。我鱗不盈寸。我羽不盈尺。一木有餘陰。一泉有餘澤。我將辭海水。濯鱗清冷池。我將辭鄧林。刷羽蒙籠枝。海水非愛廣。鄧林非愛枝。風波亦常事。鱗羽自不宜。我鱗日已大。我羽日已脩。風波

無所苦。還作鯨鵬遊。

贈崔立之

昔者十日雨。子桑苦寒饑。夜歌坐空屋。不怨但自悲。其友
名子輿。忽然憂且思。褰裳觸泥水。裹飯往食之。入門相對
語。天命良不疑。好事漆園吏。書之存雄辭。千年事已遠。二
子情可推。我讀此篇日。正當雨雪時。吾身固已困。吾友復
何爲。薄粥不足裹。深泥諒難馳。曾無子輿事。空賦子桑詩。

贈河陽李大夫

四海失巢穴。兩都困塵埃。感恩由未報。惆悵空一來。裘破
氣不暖。馬羸鳴且哀。主人情更重。空使劒鋒摧。

苦寒歌

黃昏苦寒歌夜半不能休豈不有陽春節歲聿其周君何
愛重裘兼味養大賢冰食葛製神所憐填窗塞戶慎勿出
暄風暖景明年日

贈同遊者

已見正集

請遷玄宗廟議

右禮儀使奏謹按周禮天子七廟三昭三穆與太祖之廟
而七尚書咸有一德亦曰七世之廟可以觀德荀卿子曰
有天下者祭七代有一國者祭五代則知天子上祭七廟
典籍通規祖功宗德不在其數國朝九廟之制法周之文
太祖景皇帝始爲唐公肇基天命義同周之后稷高祖神
堯皇帝創業經始化隋爲唐義同周之文王太宗文皇帝

神武應期。造有區夏。義同周之武王。其下三昭三穆。謂之親廟。與太祖而七。四時常饗。自如禮文。伏以今年宗廟遞遷。玄宗明皇帝在三昭三穆之外。是親盡之祖。雖有功德。新主入廟。禮合祧藏。太廟中第一夾室。每至禘祫之歲。合食如常。謹議。

范蠡招大夫種

詩之序議

三器論

韓文外集卷之一終

韓文外集卷之二

上賈滑州書

愈儒服者不敢用他術干進。又惟古執贄之禮。竊整頓舊所著文一十五章。以爲贄。而喻所以然之意於此。曰。豐山上有鍾焉。人所不可至。霜旣降。則鏗然鳴。蓋氣之感。非自鳴也。愈年二十有三。讀書學文十五年。言行不敢戾於古人。愚固泯泯。不能自計。周流四方。無所適歸。伏惟閣下昭融古之典義。含和發英。作唐德元。簡棄詭說。保任皇極。是宜小子刻心悚慕。又焉得不感而鳴哉。徒以獻策闕下。方勤行役。且有負薪之疾。不得稽首軒階。遂拜書家僕。待命于鄭之逆旅。伏以小子之文。可見於十五章之內。小子之

卓
志可見於此書。與之進敢不勉。與之退敢不從。進退之際。實惟閣下裁之。

上考功崔虞部書

愈不肖。行能誠無可取。行已頗僻。與時俗異態。抱愚守迷。固不識仕進之門。廼與羣士爭名競得失。行人之所甚鄙。求人之所甚利。其爲不可。雖童昏實知之。如執事者。不以是爲念。援之幽窮之中。推之高顯之上。是知其文之或可。而不知其人之莫可也。知其人之或可。而不知其時之莫可也。旣以自咎。又歎執事者所守異於人人。廢耳任目。華實不兼。故有所進。故有所退。且執事始考文之明日。浮囁之徒已相與稱曰。某得矣。某得矣。問其所從來。必言其有

自一日之間九變其說凡進士之應此選者三十有二人其所不言者數人而已而愈在焉及執事既上名之後三人之中其二人者固所傳聞矣華實兼者也果竟得之而又升焉其一人者則莫之聞矣實與華違行與時乖果竟退之如是則可見時之所與者時之所不與者之相遠矣然愚之所守竟非偶然故不可變凡在京師八九年矣足不跡公卿之門名不譽於大夫士之口始者謬爲今相國所第此時惟念以爲得失固有天命不在趨時而偃仰一室嘯歌古人今則復疑矣未知夫天竟如何命竟如何由人乎哉不由人乎哉欲事干謁則患不能小書困於投刺欲學爲佞則患言訥詞直卒事不成徒使其躬僂焉而不

終日是以勞思長懷中夜起坐度時揣已廢然而返雖欲從之末由也已又常念古之人日已進今之人日已退夫古之人四十而仕其行道爲學既已大成而又之死不倦故其事業功德老而益明死而益光故詩曰雖無老成人尚有典刑言老成之可尚也又曰樂只君子德音不已謂死而不亡也夫今之人務利而遺道其學其問以之取名致官而已得一名獲一位則棄其業而役役於持權者之門故其事業功德日以忘月以削老而益昏死而遂亡愈今二十有六矣距古人始仕之年尚十四年豈爲晚哉行之以不息要之以至死不有得於今必有得於古不有得於身必有得於後用此自遣且以爲知己者之報執事以

爲如何哉。其信然否也。今所病者。在於窮約。無僦屋賃僕之資。無緼袍糲食之給。驅馬出門。不知所之。斯道未喪。天命不欺。豈遂殆哉。豈遂困哉。竊惟執事之於愈也。無師友之交。無久故之事。無顏色言語之情。卒然振而發之者。必有以見知爾。故盡暴其所志。不敢以默。又懼執事多在省。非公事不敢以至。是則拜見之不可期。獲侍之無時也。是以進其說如此。庶執事察之也。

與張徐州薦薛公達書

與少室李拾遺書

十二月某日。愈頓首。伏承天恩。詔河南敦諭拾遺公。朝廷之士。引頸東望。若景星鳳皇之始見也。爭先覩之。爲快。方

今天子仁聖。小大之事。皆出宰相。樂善言如不得聞。自即大位已來。於今四年。凡所施者。無不得宜。勤儉之聲。寬大之政。幽閨婦女。草野小人。皆飽聞而厭道之。愈不通於古。請問先生。世非太平之運歟。加又有非人力而至者。年穀孰衍。符貺委至。若干紀之姦。不戰而拘。曩疆梁之兇。銷鑠縮栗。迎風而委伏。其有一事未就。正自視若不成人。四海之所環無一夫甲而兵者。若此時也。拾遺公不疾起與天下之士。君子樂成而亨之。斯無時矣。昔者孔子知不可爲而爲之不已。足跡接於諸侯之國。即可爲之時。自藏深山。牢關而固距。即與仁義者異守矣。想拾遺公冠帶就車。惠然肯來。舒所蓄積。以補綴盛德之有闕遺。利加於時。名垂

於將來踴躍悚企。傾刻以冀。又竊聞朝廷之議。必起拾遺公。使者往若不許。即河南必繼以行。拾遺徵君若不至。必加高秩。如是則辭少就多。傷於廉而害於義。拾遺公必不爲也。善人斯進。其類皆有望於拾遺公。拾遺公儻不爲起。使衆善人不與斯人施也。由拾遺公而使天子不盡得良臣。君子不盡得顯位。人庶不盡被惠利。其害不爲細。必望審察而遠思之。務使合於孔子之道。幸甚。愈再拜。

答劉秀才論史書

六月九日。韓愈白。秀才辱問。見愛教勉。以所宜務。敢不拜賜。愚以爲凡史氏褒貶大法。春秋已備之矣。後之作者在。據事跡實錄。則善惡自見。然此尚非淺陋偷惰者所能就。

况褒貶邪。孔子聖人。作春秋。辱於魯衛。陳宋。齊楚。卒不遇而死。齊太史氏兄弟幾盡。左丘明紀春秋時事。以失明。司馬遷作史記。刑誅。班固瘐死。陳壽起又廢。卒亦無所至。王隱謗退死家。習鑿齒無一足。崔浩范曄亦誅。魏收夭絕。宋孝王誅死。足下所稱吳兢。亦不聞身貴。而今其後有聞也。夫爲史者。不有人禍。則有天刑。豈可不畏懼而輕爲之哉。唐有天下二百年矣。聖君賢相相踵。其餘文武之士立功名。跨越前後者。不可勝數。豈一人卒卒能紀而傳之邪。僕年志已就衰退。不可自敦率。宰相知其無他才能不足用。哀其老窮。齟齬無所合。不欲令四海內有戚戚者。猥言之。上苟加一職榮之耳。非必督責追蹙。令就功役也。賤不敢

逆盛指行且謀引去。且傳聞不同。善惡隨人所見。甚者附
黨憎愛不同。巧造語言。鑿空構立。善惡事迹。於今何所承
受。取信而可。草草作傳記。令傳萬世乎。若無鬼神。豈可不
自心慙愧。若有鬼神。將不福人。僕雖騃亦粗知自愛。實不
敢率爾爲也。夫聖唐鉅跡。及賢士大夫事。皆磊磊軒天地。
決不沈沒。今館中非無人。將必有作者。勤而纂之。後生可
畏。安知不在足下。亦宜勉之。愈再拜。

與大顛師書

愈啓。孟夏漸熱。惟道體安和。愈弊劣無謂。坐事貶官。到此
久聞道德。切思見顏。緣昨到來。未獲參謁。儻能暫垂見過。
實爲多幸。已帖縣令。具人船奉迎。日久竚瞻。不宣。愈白。

愈啓海上窮處無與話言側承道高思獲披接專輒有此
咨屈儻惠能降喻非所敢望也至此一二日却歸高居亦
無不可旦夕渴望不宣愈白

愈啓惠勻至辱答問珍悚無已所示廣大深迥非造次可
諭易大傳曰書不盡言言不盡意然則聖人之意其終不
可得而見邪如此而論讀來一百遍不如親見顏色隨問
而對之易了此旬來晴明旦夕不甚熱儻能乘閑一訪幸
甚旦夕馳望愈聞道無疑滯行止繫縛苟非所戀著則山
林閑寂與城郭無異大顛師論甚宏博而必守山林義不
至城郭自激修行獨立空曠無累之地者非通道也勞於
一來安於所適道故如是不宣愈頓首

外集卷之二終

韓文外集卷之三

送汴州監軍俱文珍序

并詩

今之天下之鎮陳留爲大屯兵十萬連地四州左淮右河
抱負齊楚濁流浩浩舟車所同故自天寶已來當藩垣屏
翰之任有弓矢鈇鉞之權皆國之元臣天子所左右其監
統中貴必材雄德茂榮耀寵光能俯達人情仰喻天意者
然後爲之故我監軍俱公輟侍從之榮受腹心之寄奮其
武毅張我皇威遇變出奇先事獨運偃息談笑危疑以平
天子無東顧之憂方伯有同和之美十三年春將如京師
相國隴西公飲餞於青門之外謂功德皆可歌之也命其
屬咸作詩以鋪繹之詩曰

奉使羌池靜。臨戎汴水安。冲天鵬翅闊。報國劒鋌寒。曉日
驅征騎。春風詠采蘭。誰言臣子道。忠孝兩全難。

送浮屠令縱西游序

其行異其情同。君子與其進可也。令縱釋氏之秀者。又善
爲文。浮游徜徉。跡接天下。藩維大臣。文武豪士。令縱未始
不褰衣而負業。往造其門下。其有尊行美德。建功樹業。令
縱從而爲之歌頌。典而不諛。麗而不淫。其有中古之遺風。
與乘閒致密。促席接膝。譏評文章。商較人士。浩浩乎不窮。
悃悃乎深而有歸。於是乎吾忘令縱之爲釋氏之子也。其
來也雲凝其去也風休。方懽而已辭。雖義而不求。吾於令
縱不知其不可也。蓋賦詩以道其行。

與路鵠秀才序

贈別序

送毛仙翁十八兄序

韓文外集卷之三終

韓文

外集卷三

二

卷三

卷三

韓文外集卷之四

通解

今之人以一善爲行而耻爲之慕達節而稱夫通才者多矣然而脂膏汨沒以至於老死者相繼亦未見他之稱其豈非亂教賊名之術歟且五常之教與天地皆生然而天下之人不得其師終不能自知而行之矣故堯之前千萬年天下之人促促然不知其讓之爲美也於是許由哀天下之愚且以爭爲能迺脫屣其九州高揖而辭堯由是後之人竦然而言曰雖天下猶有薄而不售者況其小者乎故讓之教行於天下許由爲之師也自桀之前千萬年天下之人循循然不知忠易其死也故龍逢哀天下之不仁

覩君父百姓入水火而不救於是進盡其言退就割烹故後之臣竦然而言曰雖萬死猶有忠而不懼者況其小者乎故忠之教行於天下由龍逢爲之師也自周之前千萬年渾渾然不知義之可以換其生也故伯夷哀天下之偷且以彊則服食其葛薇逃山而死故後之人竦然而言曰雖餓死猶有義而不懼者況其小者乎故義之教行於天下由伯夷爲之師也是三人俱以一身立教而爲師於百千萬年間其身亡而其教存扶持天地功亦厚矣嚮令三師耻獨行慕通達則堯之日必曰得位而濟道安用讓爲夏之日必曰長進而否退安用死爲周之日必曰和光而同塵安用餓爲若然者天下之人促促然而爭循循然而

佞渾渾然而偷其何懼而不爲哉是則三師生於今必謂
偏而不通者矣其可不謂之大賢人者哉嗚呼今之人其
慕通達之爲弊也且古聖人言通者蓋百行衆藝備於身
而行之者也今恒人之言通者蓋百行衆藝闕於身而求
合者也是則古之言通者通於道義今之言通者通於私
曲其亦異矣將欲齊之者其不猶矜糞丸而擬質隨珠者
乎且令今父兄教其子弟者曰爾當通於行如仲尼雖愚
者亦知其不能也曰爾尚力一行如古之一賢雖中人亦
希其能矣豈不由聖可慕而不可齊邪賢可及而可齊也
今之人行未能及乎賢而欲齊乎聖者亦見其病矣夫古
人之進修或幾乎聖人今之人行不出乎中人而耻乎力

一行爲獨行。且曰。我通同如聖人。彼其欺心邪。吾不知矣。彼其欺人而賊名邪。吾不知矣。余懼其說之將深。爲通解。

擇言解

火洩於密而爲用。且大能不違於道。可燔可炙。可鎔可甄。以利乎生物。及其放而不禁。反爲災矣。水發於深而爲用。且遠能不違於道。可浮可載。可飲可灌。以濟乎生物。及其導而不防。反爲患矣。言起於微而爲用。且博能不違於道。可化可令。可告可訓。以推於生物。及其縱而不慎。反爲禍矣。火旣我災。有水而可伏其焰。能使不陷於灰燼矣。水旣我患。有土而可遏其流。能使不仆於波濤矣。言旣我禍。卽無以掩其辭。能不懼於過者。亦鮮矣。所以知理者。又焉得。

不擇其言歟其爲愼而甚於水火。

鄆人對

鄆有以孝爲旌門者乃本其自於鄆人曰彼自剔股以奉
母疾瘳大夫以聞其令尹令尹以聞其上上俾聚土以旌
其門使勿輸賦以爲後勸鄆大夫常曰他邑有是人乎愈
曰母疾則止於烹粉藥石以爲是未聞毀傷支體以爲養
在教未聞有如此者苟不傷於義則聖賢當先衆而爲之
也是不幸因而致死則毀傷滅絕之罪有歸矣其爲不孝
得無甚乎苟有合孝之道又不當旌門蓋生人之所宜爲
曷足爲異乎旣以一家爲孝是辨一邑里皆無孝矣以一
身爲孝是辨其祖父皆無孝矣然或陷於危難能固其忠

孝而不苟生之逆亂以是而死者乃旌表門閭爵祿其子孫斯爲爲勸已矧非是而希免輸者乎曾不以毀傷爲罪滅絕爲憂不罾於市而已黷於政况復旌其門

河南府同官記

永貞元年愈自陽山移江陵法曹參軍獲事河東公公嘗與其從事言建中初天子始紀年更元命官司舉貞觀開元之烈羣臣惕慄奉職命材登良不敢私違當時自齒朝之士而上以及下百執事官闕一人將補必取其良然而河南同時於天下稱多獨得將相五人故於府之參軍則得我公於河南主簿則得故相國范陽盧公於汜水主簿則得故相國今太子賓客滎陽鄭公於陸渾主簿則得相

國今吏部侍郎天水趙公於登封主簿則得故吏部尚書
東都留守吳郡顧公盧公去河南爲右補闕其後由尚書
左丞至宰相鄭公去汜水爲監察御史佐山南軍其後由
工部侍郎至宰相罷而文爲趙公去陸渾爲右拾遺其後
由給事中爲宰相顧公去登封爲監察御史其後由京兆
尹至吏部尚書東都留守我公去府爲長水尉其後由膳
部郎中爲荆南節度行軍司馬遂爲節度使自工部尚書
至吏部尚書三相國之勞在史冊顧吏部慎職小心于時
有聲我公愿潔而沈密開亮而卓偉行茂于宗事修于官
嗣紹家烈不違其先作帥南荆厥聞休顯武志旣揚文教
亦熙登槐贊元其慶且至故好語故事者以爲五公之始

迹也同。其後進而偕大也亦同。其稱名臣也又同。官職雖分而功德有巨細。其有忠勞於國家也同。有若將同其後而先同其初也。有聞而問者。於是馬書既五年始立石刻。其語河南府參軍舍庭中。於時河東公爲左僕射宰相。出藩大邦。開府漢南。鄭公以工部尚書留守東都。趙公以吏部尚書鎮江陵。漢南地連七州。戎士十萬。其官宰相也。留守之官居禁省中。歲時出旌旗序留司文武百官於官城門外而衙之。江陵故楚都也。戎士五萬。三公同時千里相望。可謂盛矣。河東公名均。姓裴氏。

記宜城驛

此驛置在古宜城內。驛東北有井。傳是昭王井。有靈異。至

今人莫汲驛前水傳是白起堰西山下澗灌此城壞楚人多死流城東陂臭聞遠近因號其陂臭陂有蛟害人漁者避之井東北數十步有楚昭王廟有舊時高木萬株多不得其名歷代莫敢剪伐尤多古松大竹于太傅帥襄陽遷宜城縣并改造南境數驛材木取足此林舊廟屋極宏盛今惟草屋一區然問左側人尚云每歲十月民相率聚祭其前廟後小城蓋王居也其內處偏高廣圓八九十畝號殿城當是王朝內之所也多輒可爲書硯自小城內地今皆屬甄氏甄氏於小城北立墅以居甄氏有節行其子逢以學行爲助教元和十四年二月二日題

題李生壁

余始得李生於河中。今相遇於下邳。自始及今十四年矣。始相見。吾與之皆未冠。未通人事。追思多有可笑者。與生皆然也。今者相遇。皆有妻子。昔時無度量之心。寧復可有是生之爲交。何其近古人也。是來也。余黜於徐州。將西居於洛陽。汎舟於清冷池。泊於文雅臺下。西望商丘。東望修竹園。入微子廟。求鄒陽枚叔司馬相如之故文。久立於廟陛間。悲那頌之不作。於是者已久。隴西李翱太原王涯上谷侯喜實同與焉。貞元十六年五月十四日。昌黎韓愈書。

韓文外集卷之四終

韓文外集卷之五

除崔羣戶部侍郎制

勅地官之職邦教是先必選國華以從人望具官崔羣體道履仁外和内敏清而容物善不近名從容禮樂之間特達珪璋之表比參密命弘益旣多及貳儀曹陞擢惟允邁茲令德藹然休聲選賢與能于今雖重擇才均賦自古尤難往慎乃司以服嘉命可

祭董相公文

維貞元十五年歲次己卯二月乙亥朔某日節度行軍司馬檢校右散騎常侍兼御史大夫知使事吳縣開國男食邑三百戶陸長源度支營田判官檢校金部員外郎侍御

史孟叔度觀察支使監察御史裏行丘穎觀察推官守祕
書省校書郎韓愈等謹以少牢之奠敬祭于故尚書右僕
射平章事隴西公之靈嗚呼天高而明地厚而平五氣叙
行萬彙順成交感旁暢聖賢以生雨水于雲瀆水于坤蕃
昌生物有假有因天眷唐邦錫之元臣肫肫元臣其德孔
碩不諂不笑不威不赫不求其盈不致其敵爰立作相訐
謨實勤出若無辭疇德之聞帝念東土公其來撫乃守洛
都乃藩浚郊廼去厥疾乃施厥膏不知其勞鰥寡以饒維
昔浚郊厥亂維舊有狡有狂其羣孔醜公其來矣爲民父
母父誨其義母仁其愚旣變旣從孰云其初自邇徂遠混
然一區公來自中天子所倚公今不歸誰佐天子公旣來

止東人以完公既歿矣人誰與安濁流渾渾有闕其郭填
道歡呼公來之初今公之歸公在喪車旨酒既盈嘉肴在
盛嗚呼我公庶享其誠尚饗

雷塘禱雨文

祭石君文

維元和七年歲次壬辰七月二十七日右補闕宋景國子
博士韓愈謹以清酌庶羞之奠敬祭于石三學士之靈惟
君學成于身名彰于人知道之可行見人之不幸不事顧
讓以圖就功如何奄忽永喪其躬曰景與愈與游爲久自
君之逝相遇輒哀傍無強親子孩妻姪敢忘分濟念力未
任客葬秦原孤魂誰附奠以送訣悲何可窮尚饗

祭房君文

維某年月日。愈謹遣舊吏皇甫悅。以酒肉之饋。展祭于五
官。蜀客之柩前。嗚呼君。廼至於此。吾復何言。若有鬼神。吾
未死。無以妻子爲念。嗚呼君。其能聞吾此言否。尚饗。

高君僊硯銘

并序

儒生高常。與予下天壇。中路獲硯石。似馬蹄狀。外稜孤聳。
內發墨色。幽竒天然。疑神僊遺物。寶而用之。請予銘底。
僊馬有靈迹。在于石。稜而宛中。有點墨迹。文字之祥。君家
其昌。

高君畫贊

君子溫閑。骨氣委和。迹不拒物。心不揚波。澄源卷璞。含白

嗟嗟遺紙一張德音不忘

潮州請置鄉校牒

孔子曰道之以政齊之以刑則民免而無耻不如以德禮爲先而輔以刑政也夫欲用德禮未有不由學校師弟子者此州學廢日久進士明經百十年間不聞有業成貢於王庭試於有司者人吏目不識鄉飲酒之禮耳未嘗聞鹿鳴之歌忠孝之行不勸亦縣之耻也夫十室之邑必有忠信今此州戶萬有餘豈無庶幾者耶刺史縣令不躬爲之師里間後生無所從學爾趙德秀才沈雅專靜頗通經有文章能知先王之道論說且排異端而宗孔氏可以爲師矣請攝海陽縣尉爲衙推官專勾當州學以督生徒興愷

韓文外集卷之三
梯之風。刺史出已俸百千。以爲舉本。收其贏餘。以給學生
厨饌。

直諫表

論顧威狀

韓文外集卷之五終

韓文外集卷之六

順宗實錄一

順宗至德大聖大安孝皇帝諱誦德宗長子母曰昭德皇后王氏上元二年正月十二日生大曆十四年封爲宣王建中元年立爲皇太子慈孝寬大仁而善斷留心藝學亦微信尚浮屠法禮重師傅引見輒先拜善隸書德宗之爲詩并他文賜大臣者率皆令上書之德宗之幸奉天倉卒間上常親執弓矢率軍後先導衛備嘗辛苦上之爲太子於父子間慈孝交洽無嫌每以天下爲憂德宗在位久稍不假宰相權而左右得因緣用事外則裴延齡李齊運韋渠牟等以姦佞相次進用延齡尤狡險判度支務刻剥聚

歛以自爲功。天下皆怨怒。上每進見。候顏色。輒言其不可。至陸贄、張滂、李充等。以毀譴。朝臣懷懼。諫議大夫陽城等。伏閣極論。德宗怒甚。將加城等罪。內外無敢救者。上獨開解之。城等賴以免。德宗卒。不相延齡渠牟。上有力焉。貞元二十一年癸巳。德宗崩。景申。上即位太極殿。冊曰維貞元二十一年。歲次乙酉。正月辛未朔二十三日癸巳。皇帝若曰。於戲。天下之大。實惟重器。祖宗之業。允屬元良。咨爾皇太子。誦睿哲。溫恭寬仁。慈惠文武之道。秉自生知。孝友之誠。發於天性。自膺上嗣。毓德春闈。恪愼于厥躬。祗勤于大訓。必能誕敷至化。安勸庶邦。朕寢疾彌留。弗興弗寤。是用命爾繼統。俾紹前列。宜陟元后。永綏兆人。其令中書侍

郎平章事高郢奉冊即皇帝位。爾惟奉若天道。以康四海。懋建皇極。以熙庶功。無忝我高祖太宗之休命。上自二十一年九月。得風疾。因不能言。使四面求醫藥。天下皆聞知。德宗憂感形于顏色。數自臨視。二十一年正月朔。含元殿受朝。還至別殿。諸王親屬進賀。獨皇太子疾不能朝。德宗爲之涕泣悲傷。歎息。因感疾恍惚。日益甚。二十餘日。中外不通。兩宮安否。朝臣咸憂懼。莫知所爲。雖翰林內臣亦無知者。二十三日。上知內外憂疑。紫衣麻鞋。不俟正冠。出九僊門。召見諸軍使。京師稍安。二十四日。宣遺詔。上緣服見百寮。二十六日。即位。上學書於王伾。頗有寵。王叔文以基進。俱待詔翰林。數侍太子基。叔文詭譎多計。上在東宮。嘗與

諸侍讀并叔文論政至宮市事上曰寡人方欲極言之衆
皆稱贊獨叔文無言既退上獨留叔文謂曰向者君奚獨
無言豈有意邪叔文曰叔文蒙幸太子有所見敢不以聞
太子職當侍膳問安不宜言外事陛下在位久如疑太子
收人心何以自解上大驚因泣曰非先生寡人無以知此
遂大愛幸與王伾兩人相依附俱出入東宮聞德宗大漸
上疾不能言伾即入以詔召叔文入坐翰林中使決事伾
以叔文意入言於宦者李忠言稱詔行下外初無知者以
檢校司空平章事杜佑攝冢宰兼山陵使中丞武元衡爲
副使宗正卿李紆爲按行山陵地使刑部侍郎鄭雲逵爲
鹵簿使又命中書侍郎平章事高郢撰哀冊文禮部侍郎

權德輿撰謚冊文。太常卿許孟容撰議文。庚子百寮請
聽政曰。自漢以來。喪期之數。以日易月。而皆三日而聽政。
我國家列聖亦克脩奉。罔或有違。况大行皇帝酌於故實。
重下遺詔。今日至期。而陛下未親政事。羣臣不敢安。宜存
大孝。以寧萬國。天下之幸。不許。是月昇泗州爲上州。二
月辛丑朔。中書侍郎平章事臣郢。門下侍郎平章事臣珣。
瑜。檢校司空平章事臣佑。奉疏曰。大行皇帝知陛下仁孝。
慮陛下悲哀。不即人心聽政事。故發遺詔。令一行漢氏之
制。今陛下安得守曾閔匹夫之小行。忘皇王繼親之大孝。
以虧臣子承順之義。猶不許。壬寅。宰臣又上言曰。陛下
以聖德至孝。繼受寶命。宜奉先帝約束。以時聽斷。不可以

久從之。癸卯朝百寮于紫宸門。杜佑前跪進曰。陛下居憂過禮。羣臣懼焉。願一覩聖顏。因再拜而起。左右乃爲皇帝舉帽。百寮皆再拜。佑復奏曰。陛下至性殊常。哀毀之甚。臣等不勝惶灼。伏望爲宗廟社稷。割哀強食。景午。罷翰林。陰陽星上。醫相覆。碁諸待詔三十二人。初。王叔文以碁待詔。旣用事。惡其與已儕類相亂。罷之。已酉。易定節度使張茂昭。可同中書門下平章事。餘如故。河北節度自至德已來。不常朝覲。前年冬。茂昭來朝。未還。故寵之。辛亥。詔吏部侍郎韋執誼守左丞。同中書門下平章事。賜紫。初。執誼爲翰林學士。知叔文幸於東宮。傾心附之。叔文亦欲自廣朋黨。密與交好。至是。遂特用爲相。乙卯。大常奏禮。

云喪三年不祭。惟祭天地社稷。周禮園鍾之均六變。天神
皆降。林鍾之均八變。地示咸出。不廢天地之祭。不敢以卑
廢尊也。樂者所以降神也。不以樂則祭不成。今遵遺詔。行
易月之制。請制內遇祭輟樂。終制用樂。從之。又奏禮三年
祭宗廟。今請竢祔廟畢復常。從之。辛酉。貶京兆尹李實
爲通州長史。詔曰。實素以宗屬累。更任使驟升班列。遂極
寵榮。而政乖惠和。務在苛厲。比年旱歉。先聖憂人。特詔逋
科悉皆蠲免。而實敢肆誣罔。復令徵剥。頗紊朝廷之法。實
惟聚斂之臣。自國哀已來。增毒彌甚。無辜斃踣。深所興嗟。
朕嗣守洪業。敷弘理道。寧容蠹政以害齊人。宜加貶黜。用
申邦憲。尚從優貸。俾佐遠藩。實諂事李齊運。驟遷至京兆。

尹恃寵強愎，不顧文法。是時春夏旱，京畿乏食，實一不以介意。方務聚歛徵求，以給進奉。每奏對，輒曰：「今年雖旱，而穀甚好，由是租稅皆不免。人窮至壞屋賣瓦，木貸麥苗，以應官。優人成輔端爲謠嘲之。」實聞之，奏輔端誹謗朝政，杖殺之。實遇侍御史王播於道，故事，尹與御史相遇，尹下道避。實不肯避，導騎如故。播詰讓導騎者，實怒，遂奏播爲三原令，廷詬之。陵轢公卿已下，隨喜怒誣奏遷黜。朝廷畏忌之，嘗有詔免畿內逋租，實不行，用詔書徵之如初。勇於殺害人吏，不聊生。至譴市里，譴呼皆袖瓦礫遮道伺之。實由間道獲免。壬戌，制殿中丞皇太子侍書翰林待詔王伾可守左常侍，依前翰林待詔蘇州司功王叔文可起居舍。

人翰林學士又以司勳員外郎翰林學士知制誥鄭綱爲
中書舍人學士如故又以給事中馮伉爲兵部侍郎以兵
部員外郎史館修撰歸登爲給事中修撰如故登伉皆上
在東宮時侍讀以師傳恩拜

韓文外集卷之六終

韓文

外集卷六

五

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

王世貞先生集卷之六

韓文外集卷之七

順宗實錄二

二月甲子。上御丹鳳門。大赦天下。自貞元二十一年二月二十四日昧爽已前。大辟已下。罪無輕重。常赦所不原者。咸赦原之。諸色人中有才行兼茂。明於理體者。經術精深。可爲師法者。達於吏理。可使從政者。宜委常參官各舉所知。其在外者。長吏精加訪擇。具名聞奏。仍優禮發遣。舊事宮中有要市外物。令官吏主之。與人爲市。隨給其直。貞元末。以宦者爲使。抑買人物。稍不如本估。末年不復行文書。置白望數百人於兩市。并要鬧坊。閱人所賣物。但稱宮市。即歛手付與。真僞不復可辨。無敢問所從來。其論價之高

下者率用百錢物買人直數千錢物仍索進奉門戶并腳
價錢將物詣市至有空手而歸者名爲宮市而實奪之嘗
有農夫以驢負柴至城賣遇宦者稱宮市取之纔與絹數
尺又就索門戶仍邀以驢送至內農夫涕泣以所得絹付
之不肯受曰湏汝驢送柴至內農夫曰我有父母妻子待
此然後食今以柴與汝不取直而歸汝尚不肯我有死而
已遂毆宦者街吏擒以聞詔黜此宦者而賜農夫絹十匹
然宮市亦不爲之改易諫官御史數奏疏諫不聽上初登
位禁之至大赦又明禁又貞元中要乳母皆令選寺觀婢
以充之而給與其直例多不中選寺觀次當出者賣產業
割與地買之貴有姿貌者以進其徒苦之至是亦禁焉貞

元末五坊小兒張捕鳥雀於閭里皆爲暴橫以取錢物至有張羅網於門不許人出入者或有張井上者使不得汲水近之輒曰汝驚供奉鳥雀痛毆之出錢物求謝乃去或相聚飲食於肆醉飽而去賣者或不知就索其直多被毆罵或時留蛇一囊爲質曰此蛇所以致鳥雀而捕之者今留付汝幸善飼之勿令饑渴賣者愧謝求哀乃攜而去上在春宮時則知其弊常欲奏禁之至即位遂推而行之人情大悅乙丑停鹽鐵使進獻舊鹽鐵錢物悉入正庫一助經費其後主此務者稍以時市珍翫時新物充進獻以求恩澤其後益甚歲進錢物謂之美餘而經入益少至貞元末遂月有獻焉謂之月進至是乃罷命右金吾將軍兼

中丞田景度持節告哀於吐蕃。以庫部員外熊執易爲副。兵部郎中兼中丞元季方告哀于新羅。且冊立新羅嗣王。主客員外郎兼殿中監馬干爲副。三月庚午朔出後宮。三百人。辛未。以翰林待詔王伾爲翰林學士。壬申。以故相撫州別駕姜公輔爲吉州刺史。前戶部侍郎判度支汀州別駕蘇弁爲忠州刺史。追故相忠州刺史陸贄。郴州別駕鄭餘慶。前京兆尹杭州刺史韓臯。前諫議大夫道州刺史陽城。赴京師。德宗自貞元十年已後。不復有赦令。左降官雖有名德才望。以微過忤旨。譴逐者。一去皆不復叙用。至是人情大悅。而陸贄陽城皆未聞追詔。而卒於遷所。士君子惜之。癸酉。出後宮并教坊女妓六百人。聽其親。

戚迎于九僊門。百姓相聚，謹呼大喜。景戌，詔曰：「檢校司空平章事杜佑，可檢校司徒平章事，充度支并鹽鐵使，以浙西觀察李錡爲浙西節度檢校刑部尚書，賜徐州軍額。」曰：「武寧制曰：『朕新委元臣，綜釐重務，爰求貳職，固在能臣。』」起居舍人王叔文精識環材，寡徒少欲，質直無隱。沈深有謀，其忠也。盡致君之大方，其言也達。爲政之要道，凡所詢訪，皆合大猷，宜繼前勞。佇光新命，可度支鹽鐵副使，依前翰林學士，本官賜如故。初，叔文既專內外之政，與其黨謀曰：「判度支則國賦在手，可以厚結諸用事人，取兵士心，以固其權。驟使重職，人心不服。藉杜佑雅有會計之名，位重而務自全，易可制。故先令佑主其名，而除之爲副，以專之。」

以戶部尚書判度支王紹爲兵部尚書以吏部郎中李鄘爲御史中丞武元衡爲左庶子初叔文黨數人貞元末已爲御史在臺至元衡爲中丞薄其人待之鹵莽皆有所憾而叔文又以元衡在風憲欲使附已使其黨誘以權利元衡不爲之動叔文怒故有所授 庚寅制門下侍郎守吏部尚書平章事賈耽可檢校司空兼左僕射守門下侍郎平章事鄭珣瑜可守吏部尚書守中書侍郎平章事高郢可守刑部尚書守尚書左丞平章事韋執誼可守中書侍郎並依前平章事 癸巳詔曰萬國之本屬在元良主器之重歸于長子所以基社稷而固邦統古之制也廣陵王某孝友溫恭慈仁忠恕博厚以容物寬明而愛人祇服訓

詞言皆合雅。講求典學。禮必從師。居有令聞。動無違德。朕
獲纘丕緒。祇若大猷。惟懷永圖。用建儲貳。以承宗廟。以奉
粢盛。爰舉舊章。俾膺茂典。宜冊爲皇太子。改名某。仍令所
司擇日備禮冊命。初。廣陵王名從。水傍享。至冊爲皇太子。
始改從今名。丁酉。吏部尚書平章事鄭珣瑜稱疾去位。
其日珣瑜方與諸相會食於中書。故事。丞相方食。百寮無
敢謁見者。叔文是日至中書。欲與執誼計事。令直省通執
誼。直省以舊事告。叔文叱直省。直省懼入白。執誼執誼遂
巡。慙赦。竟起迎叔文。就其閣語良久。宰相杜佑。高郢。珣瑜
皆停筯以待。有報者云。叔文索飯。韋相已與之。同餐閣中
矣。佑。郢等心知其不可。畏懼叔文執誼。莫敢出言。珣瑜獨

韓文外集卷之七終
歎曰吾豈可復居此位顧左右取馬徑歸遂不起前是左
僕射賈耽以疾歸第未起珣瑜又繼去二相皆天下重望
相次歸臥叔文執誼等益無所顧忌遠近大懼焉

韓文外集卷之八

順宗實錄三

夏四月乙巳上御宣政殿冊皇太子。冊曰建儲貳者必歸於冢嗣固邦本者允屬於元良咨爾元子廣陵王某幼挺岐嶷長標洵淑佩詩禮之明訓宣忠孝之弘規居惟保和動必循道識達刑政器合溫文愛敬奉於君親仁德聞於士庶神祇龜筮罔不協從是用命爾爲皇太子於戲維我烈祖之有天下也功格上帝祚流無窮光續洪業逮予十葉虔恭寅畏日慎一日付爾以承祧之重勵爾以主鬯之勤以貞萬國之心以揚三善之德爾其尊師重傳親賢遠佞非禮勿踐非義勿行對越天地之耿光丕承祖宗之休

烈可不慎歟。時上卽位已久。而臣下未有親奏對者。內外盛言。王伾王叔文專行斷決。日有異說。又屬頻雨。皆以爲羣小用事之應。至將冊禮之夕。雨乃止。迨行事之時。天氣清朗。有慶雲見。識者以爲天意所歸。及覩皇太子儀表。班行旣退。無不相賀。至有感泣者。戊申。詔曰。惟先王光有天下。必正我邦本。以立人極。建儲貳以承宗祧。所以啓迪大猷。安固洪業。斯前代之令典也。皇太子某體仁秉哲。恭敬溫文。德協元良。禮當上嗣。朕奉若丕訓。憲章前式。惟承社稷之重。載考春秋之義。授之匕鬯。以奉粢盛。爰以令辰。俾膺茂典。今冊禮云畢。感慶交懷。思與萬方同其惠澤。自貞元二十一年二月二十四日已後。至四月九日昧爽已。

前天下應犯死罪者特降從流流已下遞減一等文武常
參并州府縣官子爲父後者賜勲兩轉古之所以教太子
必茂選師傅以翼輔之法於訓詞而行其典禮左右前後
罔非正人是以教諭而成德也給事中陸質中書舍人崔
樞積學懿文守經據古夙夜講習庶協于中並克皇太子
侍讀天下孝子順孫先旌表門閭者委所管州縣各加存
卹庚戌封皇太子長子寧等六人爲郡王癸酉贈吐
蕃弔祭使工部侍郎兼御史大夫史館修撰張薦禮部尚
書薦字孝舉代居深州之陸澤祖文成博學工文詞性好
詠諧七登文學科薦聰明強記歷代史傳無不貫通爲太
師顏真卿所稱賞遂知名大曆中江東觀察表薦之授左

司禦率府兵曹參軍兼史館修撰貞元初爲太常博士四年廻紇求和親使送咸安公主入廻紇以薦爲判官改授殿中侍御史累遷諫議大夫十一年冊廻紇子薦以祕書少監持節爲使還久之遷祕書監二十年吐蕃贊普死以薦爲工部侍郎兼御史大夫持節弔贈卒於赤嶺東廻紇辟吐蕃傳歸其柩前後三使異國自始命至卒常兼史職在史館二十年著宰輔傳略五服圖記寓居錄靈怪集等景寅罷閩中萬安監先是福建觀察柳冕久不遷欲立事迹以求恩寵乃奏云閩中南朝放牧之地畜羊馬可使孳息請置監許之收境中畜產令吏牧其中羊大者不過十斤馬之良者估不過數千不經時輒死又歛百姓苦之

遠近以爲笑。至是觀察閩濟美奏罷之。丁卯命焚容州
所進毒藥可殺人者。五月己巳以杭州刺史韓臯爲尚書
左丞。辛未以右金吾大將軍范希朝爲檢校右僕射兼右
神策京西諸城鎮行營兵馬節度使。叔文欲專兵柄。藉希
朝年老舊將。故用爲將帥。使主其名。而尋以其黨韓泰爲
行軍司馬。專其事。甲戌以度支郎中韓泰守兵部郎中。
兼中丞。克左右神策京西都柵行營兵馬節度行軍司馬。
賜紫。乙亥追改爲檢校兵部郎中。職如故。甲申以萬
年令房啓爲容州刺史兼御史中丞。初啓善於叔文之黨。
因相推致。遂獲寵於叔文。求進用。叔文以爲容管經略使。
使行。約至荆南。授之云。脫不得荆南。卽與湖南。故啓宿留。

於江陵。久之。方行至湖南。又久之。而叔文與執誼爭權。數有異同。故不果。尋聞皇太子監國。啓惶駭。奔馳而往。是日以郴州員外司馬鄭餘慶爲尚書左丞。乙酉。以尚書左丞韓臯爲鄂岳觀察武昌軍節度使。初。臯自以前輩舊人。累更重任。頗以簡倨自高。嫉叔文之黨。謂人曰。吾不能事新貴人。臯從弟曄幸於叔文。以告叔文。故出之。辛卯。以王叔文爲戶部侍郎。職如故。賜紫。初。叔文欲依前帶翰林學士。宦者俱文珍等惡其專權。削去翰林之職。叔文見制書大驚。謂人曰。叔文日時至此。商量公事。若不得此院職事。卽無因而至矣。王伾曰。諾。卽疏請。不從。再疏。乃許。三五日。一入翰林。去學士名。又與歸登。同日賜紫。內出衫笏。

賜登而叔文不霑。文珍等所惡。獨不得賜。由此始懼。以衢州別駕令狐峘爲祕書少監。峘國子祭酒德棻玄孫。進士登第。司徒楊綰未達時。遇之以爲賢。爲禮部修史。引峘入史館。自華原尉拜拾遺。累遷起居舍人。大曆八年。劉晏爲吏部尚書。奏峘爲刑部員外。判南曹。累遷至禮部侍郎。峘之判南曹。晏爲尚書。楊炎爲侍郎。峘得晏之舉。分闕必擇其善者與晏。而以惡者與炎。炎固已不平。至峘爲禮部。而炎爲相。有杜封者。故相鴻漸之子。求補弘文生。炎嘗出杜氏門下。託峘以封。峘謂使者曰。相公欲封。成其名。乞署封名下一字。峘因得以記焉。炎不意峘賣之。署名屬峘。峘明日疏言。宰相炎迫臣以威。臣從之。則負陛下。不從。卽炎當

害臣德宗以問炎。炎具道所以。德宗怒曰。此姦人不可柰。欲杖而流之。炎救解。乃黜爲衡州別駕。貞元初。李泌爲相。以左庶子史館修撰徵至。則與同職孔述睿爭競細碎。數侵述睿。述睿長告。以讓不欲爭。泌卒。竇參爲相。惡其爲人。貶吉州別駕。改吉州刺史。齊映除江西觀察。過吉州。峘自以前輩懷怏怏。不以刺史禮見。入謁。從容步進。不祿首。屬戎器映以爲恨。去至府。奏峘舉前刺史過失。鞫不得真。無政事。不宜臨郡。貶衢州別駕。上卽位。以祕書少監徵。未至。卒。峘在史館。修玄宗實錄一百卷。撰代宗實錄三十卷。雖頗勤苦。然多遺漏。不稱良史。初。德宗將厚奉元陵事。峘時爲中書舍人兼史職。奏䟽諫。請薄其葬。有答詔優獎。元和

三年以修實錄功追贈工部尚書是月以襄州爲襄府徙
臨漢縣於古城曰鄧城縣

韓文外集卷之八終

湖東總志古姓曰澄姓
三以初世姓江澄湖江澄湖
澄湖江澄湖江澄湖江澄湖

韓文外集卷之九

順宗實錄四

六月乙亥貶宣州巡官羊士諤爲汀州寧化縣尉士諤性
傾躁時以公事至京遇叔文用事朋黨相煽頗不能平公
言其非叔文聞之怒欲下詔斬之執誼不可則令杖殺之
執誼又以爲不可遂貶焉由是叔文始大惡執誼往來二
人門下者皆懼先時劉闢以劔南節度副使將韋臯之意
于叔文求都領劔南三川謂叔文曰太尉使某致微誠於
公若與其三川當以死相助若不用某亦當有以相酬叔
文怒亦將斬之而執誼固執不可闢尚遊京師未去至聞
士諤遂逃歸左散騎常侍致仕張萬福卒萬福魏州元城

人也。自曾祖至父，皆明經，官止縣令、州佐。萬福以祖父業儒，皆不達，不喜書，學騎射。年十七八，從軍遼東，有功，爲將而還。累遷至壽州刺史。州送租賦詣京師，至潁川界，爲盜所奪。萬福使輕兵馳入潁川界討之，賊不意，萬福至，忙迫不得戰。萬福悉聚而誅之，盡得其所亡物，并得前後所掠人妻子財物牛馬萬計，悉還其家，爲淮南節度崔圓所忌。失刺史，改鴻臚卿，以節度副使將兵千人鎮壽州。萬福不以爲恨。許杲以平盧行軍司馬將卒三千人駐濠州，不去。有窺淮南意，圓令萬福攝濠州刺史。杲聞，即提卒去，止當塗陳莊。賊陷舒州，圓又以萬福爲舒州刺史，督淮南岸盜賊，連破其黨。大曆三年，召赴京師，代宗謂曰：「聞卿名久，欲

一識卿。且將累卿以許杲。萬福拜謝。因前曰。陛下以許杲召臣。如河北賊諸將叛。以屬何人。代宗笑曰。且欲議許杲事。方當大用卿。即以爲和州刺史。行營防禦使。督淮南岸盜賊。至州。杲懼。移軍上元。杲至楚州。大掠。節度使韋元甫命萬福討之。未至淮陰。杲爲其將康自勤所逐。自勤擁兵繼掠。循淮而東。萬福倍道追而殺之。免者十二三。盡得其虜掠金銀婦女等。皆獲致其家。代宗詔以本州兵千五百人防秋京西。遂帶和州刺史。鎮咸陽。固留宿衛。李正己反。將斷江淮路。令兵守埭橋渦口。江淮進奉船千餘隻泊渦口。不敢進。德宗以萬福爲濠州刺史。萬福馳至渦口。立馬岸上。發進奉船。溜青將士停岸。睥睨不敢動。諸道繼進。

改泗州刺史。爲杜亞所忌。徵拜左金吾衛將軍。召見。德宗驚曰。杜亞言卿昏耄。卿乃如是健耶。圖形凌煙閣。數賜酒饌衣服。并勅度支。籍口畜。給其費。至賀陽城等。於延英門外。天下益重其名。二十一年。以左散騎常侍致仕。元和元年卒。年九十。萬福自始從軍至卒。祿食七十年。未嘗病一日。典九郡。皆有惠愛。二癸丑。韋臯上表請皇太子監國。又上皇太子牋。尋而裴垍嚴綬表繼至。悉與臯同。贈故忠州別駕陸贄兵部尚書。故道州刺史陽城左常侍。贄字敬輿。吳郡人也。年十八進士及第。又以博學宏詞授鄭縣尉。書判拔萃。授渭南尉。遷監察御史。未幾。選爲翰林學士。遷祠部員外郎。德宗幸奉天。贄隨行在天下。搔擾遠近。徵發書

詔一日數十下皆出於贊贊操筆持紙成於須臾不復起草同職皆拱手嗟嘆不能有所助常啓德宗言方今書詔宜痛自引過罪已以感人心昔成湯以罪已致興後代推以爲聖人楚王失國亡走一言善而復其國至今稱爲賢者陛下誠能不恡改過以言謝天下臣雖愚陋爲詔詞無所忌諱庶能令天下叛逆者迴心喻旨德宗從之故行在制詔始下聞者雖武人悍卒無不揮涕感激議者咸以爲德宗尅平寇難旋復天位不惟神武成功爪牙宣力蓋以文德廣被腹心有助焉累遷考功郎中諫議大夫中書舍人兼翰林學士丁母憂免喪權知兵部侍郎復入翰林中
外屬意旦夕竢其爲相竇參深忌之贊亦短參之所爲且

言其贖貨。於是與參不能平。尋真拜兵部侍郎。知禮部貢舉。於進士中得人爲多。八年春。遷中書侍郎平章事。始令吏部每年集選人。舊事吏部每年集人。其後遂三年一置選。選人猥至。文書多不了。尋勘真僞紛雜。吏因得大爲姦巧。選士一蹉跌。或至十年不得官。而官之闕者。或累歲無人。贊令吏部分內外官員爲三分。計闕集人。以爲常。其弊十去七八。天下稱之。初竇參出李巽爲常州刺史。且迫其行。巽常銜之。至參貶爲郴州別駕。巽適遷湖南觀察。德宗常與參言。故相姜公輔罪。參漏其語。參敗。公輔因上疏自陳其事。非臣之過。德宗詰之。知參洩其語。怒。未有所發。會巽奏汴州節度劉士寧遺參金帛若干。士寧得汴州。參處

其議士寧常德之故致厚貶德宗以參得罪而以武將交
結發怒竟致參於死而議者多言參死由贊焉裴延齡判
度支天下皆嫉怨而獨幸於天子朝廷無敢言其短者贊
獨身當之日陳其不可用延齡固欲去贊而代之又知贊
之不與已多阻其奏請也謗毀百端翰林學士吳通玄故
與贊同職姦巧佻薄與贊不相能知贊與齡相持有間因
盛言贊短宰相趙璟本贊所引同對嫉贊之權密以贊所
戢彈延齡事告延齡延齡益得以爲計由是天子益信延
齡而不直贊竟罷贊相以爲太子賓客而黜張滂李元等
權言事者皆言其屈贊固畏懼至爲賓客拒門不納交親
士友春旱德宗數獵苑中延齡疏言贊等失權怨望言於

衆曰天下旱百姓且流亡度支愛惜不肯給諸軍軍中人無所食其事柰何以搖動羣心其意非止欲中傷臣而已後數日又獵苑中會神策軍人跪馬前云度支不給馬草德宗意延齡前言即迴馬而歸由是貶贄爲忠州別駕滂充皆斥逐德宗怒未解贄不可測賴陽城等救乃止贄之爲相常以少年入翰林得幸於天子長養成就之不敢自愛事之不可者皆爭之德宗在位久益自攬持機柄親治細事失君人大體宰相益不得行其事職而議者乃云由贄而然贄居忠州十餘年常閉門不出入人無識面者避謗不著書習醫方集古今名方爲陸氏集驗方五十卷卒於忠州年五十二上初即位與鄭餘慶陽城同徵詔始下

而城贊皆卒。城字亢宗，北平人，代爲官族，好學，貧不能得書，乃求入集賢，爲書寫吏，竊官書讀之，晝夜不出，經六年，遂無所不通，乃去滄州中條山下，遠近慕其德行，來學者相繼於道，間里有爭者，不詣官府，詣城以決之。李泌爲相，舉爲諫議大夫，拜官不辭，未至京師，人皆想望風采云。城山人能自苦刻，不樂名利，必諫諍死職下，咸畏憚之。旣至，諸諫官紛紛言事，細碎無不聞達，天子益厭苦之，而城方與其二弟牟容，連夜痛飲，人莫能窺其意，有懷刺譏之者，將造城而問者，城揣知其意，輒彊與酒，客或時先醉，仆席上，或時先醉臥客懷中，不能聽客語，約其二弟云：「吾所得月俸，汝可度吾家有幾口，月食米當幾何，買新菜鹽米。」

凡用幾錢先具之其餘悉以送酒媼無留也未嘗有所貯積雖其所服用切急不可闕者客稱其物可愛城輒喜舉而授之陳裴者候其始請月俸常往稱其錢帛之美月有獲焉至裴延齡讒毀陸贄等坐貶黜德宗怒不解在朝無救者城聞而起曰吾諫官也不可令天子殺無罪之人而信用姦臣即率拾遺王仲舒數人守延英門上疏論延齡姦佞贄等無罪狀德宗大怒召宰相入語將加城等罪良久乃解令宰相諭遣之於是金吾將軍張萬福聞諫官伏閣諫趨往至延英門大言賀曰朝廷有直臣天下必太平矣遂徧拜城與仲舒等曰諸諫議能如此言事天下安得不太平也已而連呼太平萬歲太平萬歲萬福武人時年

八十餘自此名重天下時朝夕相延齡城曰脫以延齡爲相當取白麻壞之慟哭於庭竟坐延齡事改國子司業至引諸生告之曰凡學者所以學爲忠與孝也諸生寧有久不省其親乎明日謁城歸養者二十餘人有薛約者嘗學於城狂躁以言事得罪將徙連州客寄有根帶吏縱求得城家坐吏於門與約飲決別涕泣送之郊外德宗聞之以城爲黨罪人出爲道州刺史太學王魯卿李儋等二百七十人詣闕乞留住數日吏遮止之疏不得上在州以家人禮待吏人宜罰者罰之宜賞者賞之一不以簿書介意賦稅不登觀察使數詣讓上考功第城自署第曰撫字心勞徵科政拙考下下觀察使嘗使判官督其賦至州怪城不

出迎以問州吏。吏曰：「刺史聞判官來，以爲已有罪，自囚於獄，不敢出。」判官大驚，馳入謁城於獄，曰：「使君何罪？」某奉命來候安否耳，留一兩日未去。城固不復歸館門外，有故門扇橫地，城晝夜坐臥其上。判官不自安，辭去。其後又遣他判官崔某往按之。崔承命不辭，載妻子一行，中道而逃。城以孝友，不忍與其第異處，皆不娶，給侍終身。有寡妹，依城以居。有生年四十餘，癡不能如人，常與第負之以遊。初，城之妹夫亡在他處，家貧不能葬，城親與其第，昇尸以歸，葬於其居之側，往返千餘里。卒時年六十餘。戊午，以戶部侍郎潘孟陽爲度支鹽鐵轉運副使。其日，王伾詐稱疾自免，自叔文歸第，伾日詣中人并杜佑，請起叔文爲相，且總北

軍既不得請以威遠軍使平章事又不得其黨皆憂悸不自保。伾至其日坐翰林中疏三上不報知事不濟行且臥。至夕忽叫曰伾中風矣明日遂輿歸不出。戊子以禮部侍郎權德輿爲戶部侍郎以倉部郎中判度支陳諫爲河中少尹伾叔文之黨於是始去。乙未詔軍國政事宜權令皇太子某勾當自辟羣后中外庶僚悉心輔翼以底于理宣布朕意咸使知聞上自初即位則疾患不能言至四月益甚時扶坐殿羣臣望拜而已未嘗有進見者天下事皆專斷於叔文而李忠言王伾爲之內主執誼行之於外朋黨誼譁榮辱進退生於造次惟其所欲不拘程度既知內外厭毒慮見摧敗即謀兵權欲以自固而人情益疑懼。

不測其所爲朝夕伺候會其與執誼交惡心腹內離外有
韋臯裴垍嚴綬等牋表而中官劉光奇俱文珍薛盈珍尚
解玉等皆先朝任使舊人同心怨猜屢以啓上上固已厭
倦萬機惡叔文等至是遂召翰林學士鄭網衛次公王涯
等入至德殿撰制詔而發命焉又下制以太常卿杜黃裳
爲門下侍郎左金吾衛大將軍袁滋爲中書侍郎並平章
事又下制吏部尚書平章事鄭珣瑜刑部尚書平章事高
郢並守本官罷相皇太子見百寮於東朝百寮拜賀皇太
子涕泣不答拜景申詔宰臣告天地社稷皇太子見四
方使於麟德殿西亭

韓文外集卷之九終

韓文外集卷之十

順宗實錄五

八月庚子詔曰惟皇天祐命烈祖誕受方國九聖儲祉萬方咸休肆予一人獲纘丕業嚴恭守位不遑暇逸而天祐匪降疾恙無瘳將何以奉宗廟之靈展郊禋之禮疇咨庶尹對越上玄內愧于朕心上畏于天命夙夜祗慄惟懷永圖一日萬幾不可以久曠天工人代不可以久違皇太子某睿哲溫文寬和慈惠孝友之德愛敬之誠通于神明格于上下是用推皇王至公之道遵父子傳歸之制付之重器以撫兆人必能宣祖宗之重光荷天地之休命奉若成憲永綏四方宜令皇太子卽皇帝位朕稱太上皇居興慶

宮制勅稱誥所司擇日行冊禮永貞元年八月辛丑太上
皇居興慶宮誥曰有天下者傳歸於子前王之制也欽若
大典斯爲至公式揚耿光用體文德朕獲奉宗廟臨御萬
方降疾不瘳庶政多闕乃命元子代予守邦爰以令辰光
膺冊禮宜以今月九日冊皇帝於宣政殿仍命檢校司徒
杜佑充冊使門下侍郎杜黃裳充副使國有大命恩俾惟
新宜因紀元之慶用覃在宥之澤宜改貞元二十一年爲
永貞元年自貞元二十一年八月五日昧爽已前天下應
犯死罪特降從流流已下遞減一等又下誥曰人倫之
本王化之先爰舉令圖允資內輔式表后妃之德俾形邦
國之風茲禮經之大典也良娣王氏家承茂族德冠中宮

雅修彤管之規克佩姆師之訓自服勤蘋藻祇奉宗祧令
範益彰母儀斯著宜正長秋之位以明繼體之尊良媛董
氏備位後庭素稱淑慎進升號位禮亦宜之良娣可冊爲
太上皇后良媛宜冊爲太上皇德妃仍令所司備禮擇日
冊命宣示中外咸使知聞 壬寅制王伾開州司馬王叔
文渝州司戶並員外置馳驛發遣 叔文越州人以基入
東宮頗自言讀書知理道乘間常言人間疾苦上將大論
宮市事叔文說中上意遂有寵因爲上言某可爲將某可
爲相幸異日用之密結韋執誼并有當時名欲僥倖而速
進者陸質呂溫李景儉韓曄韓泰陳諫劉禹錫柳宗元等
十數人定爲死交而凌準程异等又因其黨而進交遊蹤

跡詭祕莫有知其端者。貞元十九年補闕張正買疏諫他
事得召見。正買與王仲舒劉伯芻裴蒞常仲孺呂洞相善。
數遊止。正買得召見。諸往來者皆往賀之。有與之不善者。
告叔文。執誼云。正買疏似論君朋黨事。宜少誠。執誼叔文
信之。執誼嘗爲翰林學士。父死罷官。此時雖爲散郎。以恩
時時召入問外事。執誼因言。成季等朋讌聚遊無度。皆譴
斥之。人莫知其由。叔文旣得志。與王伾李忠言等專斷外
事。遂首用韋執誼爲相。其常所交結。相次拔擢。至一日除
數人。日夜羣聚。伾以待書幸。寢陋吳語。上所褻狎。而叔文
頗任事。自許微知文義。好言事。上以故稍敬之。不得如伾
出入無阻。叔文入至翰林。而伾入至柿林院。見李忠言牛

昭容等故各有所主。伾主往來傳授。劉禹錫陳諫韓曄韓泰柳宗元房啓凌準等主謀議唱和。採聽外事。上疾久不瘳。內外皆欲上早定太子位。叔文默不發議。已立太子。天下喜。而叔文獨有憂色。常吟杜甫題諸葛亮廟詩末句云。出師未捷身先死。長使英雄淚滿襟。因歔歔流涕。聞者咸竊笑之。雖判兩使事。未嘗以簿書爲意。日引其黨。屏人切切細語。謀奪宦者兵。以制四海之命。旣令范希朝韓泰總統京西諸城鎮行營兵馬。中人尚未悟。會邊上諸將各以狀辭中尉。且言方屬希朝。中人始悟。兵柄爲叔文所奪。乃大怒曰。從其謀。吾屬必死其手。密令其使歸告諸將曰。無以兵屬人。希朝至奉天。諸將無至者。韓泰白叔文。討無所

出唯曰奈何奈何無幾而母死執誼益不用其語叔文怒與其黨日夜謀起復起復必先斬執誼而盡誅不附已者聞者皆恟懼皇太子旣監國遂逐之明年乃殺之伾杭州人病死遷所其黨皆斥逐叔文最所賢重者李景儉而最所謂竒才者呂溫叔文用事時景儉持母喪在東都而呂溫使吐蕃半歲至叔文敗方歸故二人皆不得用叔文敗後數月乃貶執誼爲崖州司馬後二年病死海上執誼杜黃裳子壻與黃裳同在相位故最在後貶執誼進士對策高等驟遷拾遺年二十餘入翰林巧惠便辟媚幸於德宗而性貪婪詭賊其從祖兄夏卿爲吏部侍郎執誼爲翰林學士受財爲人求科第夏卿不應乃探出懷中金以內

夏卿袖夏卿驚曰吾與卿賴先人德致名位幸各已達豈可如此自毀壞擺袖引身而去執誼大慚恨旣而爲叔文所引用初不敢負叔文迫公議時時有異同輒令人謝叔文云非敢負約爲異同蓋欲曲成兄弟爾叔文不之信遂成仇怨然叔文敗執誼亦自失形勢知禍且至雖尚爲相常不自得長奄奄無氣聞人行聲輒惶悸失色以至敗死時纔四十餘執誼自卑嘗諱不言嶺南州縣名爲郎官時嘗與同舍郎詣職方觀圖每至嶺南圖執誼皆命去之閉目不視至拜相還所坐堂北壁有圖不就省七八日試就觀之乃崖州圖也以爲不祥甚惡之憚不能出口至貶果得崖州焉

永貞二年正月景戌朔太上皇於興慶宮受朝賀皇帝率百僚奉上尊號曰應乾聖壽太上皇冊文曰維永貞二年歲次景戌正月景戌朔皇帝臣某稽首再拜奉冊言臣聞上聖玄邈獨超乎希夷彊名之極猶存乎罔象豈足以表無爲之德光不宰之功然稱謂所施簡冊攸著涵泳道德感於精誠仰奉洪徽有以自竭伏惟太上皇帝陛下道繼玄元業績續皇極膺千載之休曆承九聖之耿光昭宣化源發揚大號政有敦本示儉慶裕格天恩翔春風仁育羣品而功成不處褰裳去之付神器於冲人想汾陽以高蹈體堯之德與神同符其動也天其靜也地巍巍事表無得而言顧茲寡昧屬膺大寶懼忝傳歸之業莫申繼述之志夙

夜兢畏。惟懷永圖。今天下幸安。皆睿訓所被。而未極徽號。孰報君親。是以台臣庶官。文武之列。抗疏於內。方伯藩守。億兆之衆。同詞於外。請因壽曆。以播鴻名。臣不勝大願。謹上尊號曰應乾聖壽。太上皇當三朝獻壽之辰。應五紀啓元之始。光膺徽稱。允協神休。斯天下之慶也。

元和元年正月甲申。太上皇崩于興慶宮咸寧殿。年四十六。遺詔曰。朕聞死生者物之大歸。脩短者人之常分。古先哲王。明於至道。莫不知其終。以存義順。其變以節哀。故存者不至於傷生。逝者不至於甚痛。謂之達理。以貫通喪。朕自弱齡。卽敦清靜。逮乎近歲。又嬰沈痼。嘗亦親政。益倦于勤。以皇帝天資仁孝。日躋聖敬。爰釋重負。委之康濟。而能

內睦于九族外勤于萬機問寢益嚴侍膳無曠推此至德以安庶邦朕之知子無愧天下今厥疾大漸不寤不興付託得人顧復何恨四海兆庶亦奚所哀但聖人大孝在乎善繼樞務之重軍國之殷續而承之不可暫闕以日易月抑惟舊章皇帝宜三日而聽政十三日小祥二十五日大祥二十七日釋服方鎮岳牧不用離任赴哀天下吏人誥至後出臨三日皆釋服無禁婚嫁祠祀飲酒食肉宮中當臨者朝晡各十五舉音非朝晡臨時禁無得哭釋服之後勿禁樂他不在誥中者皆以類從事伏以崇陵僊寢復土纔終旬邑疲人休功未幾今又重勞營奉朕所哀矜況漢魏二文皆著遺令永言景行常志夙心其山陵制度務從

儉約並不用以金銀錦綵爲飾百辟卿士同力盡忠克申
送往之哀宜展事居之禮布告天下明知朕懷七月壬
申葬豐陵謚曰至德大聖大安孝皇帝廟曰順宗

韓文外集卷之十終

中興聖烈皇后曰至孝大聖天子孝皇帝陳曰顯宗
 建封之文宜為事而文豈亦當天不賜以顯財
 封爵並不用以金匙鑰移為諸百親親士同休
 萬世共之

韓文集傳

新書本傳

宋景文公

韓愈字退之。鄧州南陽人。七世祖茂。有功於後魏。封安定王。父仲卿爲武昌令。有美政。旣去。縣人刻石頌德。終祕書郎。愈生三歲而孤。隨伯兄會。貶官嶺表。會卒。嫂鄭鞠之。愈自知讀書。日記數千百言。比長。盡能通六經百家學。擢進士第。會董晉爲宣武節度使。表署觀察推官。晉卒。愈從喪出。不四日。汴軍亂。乃去。依武寧節度使張建封。建封辟府推官。操行堅正。鯁言無所忌。調四門博士。遷監察御史。上疏極論宮市。德宗怒。貶陽山令。有愛在民。民生子多以其姓。字之。改江陵法曹參軍。元和初。權知國子博士。分司東

都三歲爲真。改都官員外郎。卽拜河南令。遷職方員外郎。華陰令柳澗有臯。前刺史劾奏之。未報。而刺史罷。澗諷百姓。遮索軍頓役直。後刺史惡之。按其獄。貶澗房州司馬。愈過華。以爲刺史陰相黨。上疏治之。旣御史覆問。得澗贓。再貶封溪尉。愈坐是復爲博士。旣才高數黜。官又下遷。乃作進學解。以自諭。執政覽之。竒其才。改比部郎中。史館修撰。轉考功知制誥。進中書舍人。初憲宗將平蔡。命御史中丞裴度使諸軍。按視及還。具言賊可滅。與宰相議不合。愈亦奏言。淮西連年侵掠。得不償費。其敗可立而待。然未可知者。在陛下斷與不斷耳。執政不喜。會有人詆愈在江陵時。爲裴均所厚。均子錡素無狀。愈爲文章。字命錡。謗語囂暴。

由是改太子右庶子。及度以宰相節度彰義軍，宣慰淮西。奏愈行軍司馬，愈請乘遽先入汴，說韓弘使協力。元濟平，遷刑部侍郎。憲宗遣使者往鳳翔迎佛骨入禁中，三日乃送佛祠。王公士庶奔走膜拜，至爲夷法，灼體膚，委珍貝，騰沓係路。愈聞惡之，乃上表極諫。帝大怒，持示宰相，將抵以死。裴度崔羣曰：「愈言訐牾罪之誠宜，然非內懷至忠，安能及此？」願少寬假。以來諫爭。帝曰：「愈言我奉佛太過，猶可容。至謂東漢奉佛以後，天子咸天促，言何乖刺耶？」愈人臣狂妄，敢爾，固不可赦。於是中外駭懼。雖戚里諸貴亦爲愈言。乃貶潮州刺史。旣至潮，以表哀謝。帝頗感悔，欲復用之。持示宰相曰：「愈前所論，是大愛朕，然不當言天子事佛乃年

促耳皇甫鏘素忌愈直卽奏言愈終狂疏可且內移乃改
袁州刺史初愈至潮問民疾苦皆曰惡溪有鱷魚食民畜
產且盡民以是窮數日愈自往視令其屬秦濟以一羊一
豕投溪水而祝之是夕暴風震電起谿中數日水盡涸西
徙六十里自是潮無鱷魚患袁人以男女爲隸過期不贖
則没入之愈至悉計庸得贖所没歸之父母七百餘人因
與約禁其爲隸召拜國子祭酒轉兵部侍郎鎮州亂殺田
弘正而立王廷湊詔愈宣撫旣行衆皆危之元稹言韓愈
可惜穆宗亦悔詔愈度事從宜無必入愈曰安有受君命
而滯留自顧遂疾驅入廷湊嚴兵逐之甲士陳庭旣坐廷
湊曰所以紛紛者乃此士卒也愈大聲曰天子以公爲有

將帥材故賜以節豈意同賊反邪語未終士前奮曰先太師爲國擊朱滔血衣猶在此軍何負朝廷乃以爲賊乎愈曰以爲爾不記先太師也若猶記之固善且爲逆與順利害不能遠引古事但以天寶來禍福爲爾等明之安祿山史思明李希烈梁崇義朱滔朱泚吳元濟李師道有若子若孫在乎亦有居官者乎衆曰無愈曰田公以魏博六州歸朝廷官中書令父子受旗節劉悟李祐皆大鎮此爾軍所共聞也衆曰弘正刻故此軍不安愈曰然爾曹害田公又殘其家矣復何道衆乃謹曰侍郎語是廷湊恐衆心動遽麾使去因泣謂愈曰今欲廷湊何所爲愈曰神策六軍之將如牛元翼比者不少但朝廷顧大體不可棄之公久

圍之何也。廷湊曰：「即出之。」愈曰：「若爾則無事矣。」會元翼亦潰圍出。廷湊不追。愈歸奏其語。帝大悅。轉吏部侍郎。時宰相李逢吉惡李紳。欲逐之。遂以愈爲京兆尹兼御史大夫。特詔不臺參。而除紳中丞。紳果劾奏愈。愈以詔自解。其後文刺紛然。宰相以臺府不協。遂罷愈爲兵部侍郎。而出紳江西觀察使。紳見帝得留。愈亦復爲吏部侍郎。長慶四年卒。年五十七。贈禮部尚書。謚曰文。愈性明銳。不詭隨。與人交。終始不少變。成就後進士。徃徃知名。經愈指授。皆稱韓門弟子。愈官顯。稍謝遣。凡內外親若交友。無後者。爲嫁遣孤女。而卹其家。嫂鄭喪。爲服。甚以報。每言。文章自漢司馬相如。太史公。劉向。楊雄。後作者。不世出。故愈深探本元。卓

然樹立成一家言其原道原性師說等數十篇皆與衍閎深與孟軻揚雄相表裏而佐佑六經云至它文造端置辭要爲不襲蹈前人者然惟愈爲之沛然若有餘至其徒李翱李漢皇甫湜從而效之遽不及遠甚從愈游者若孟郊張籍亦皆自名於時

贊曰唐興承五代剖分王政不綱文弊質窮蠅俚混并天下已定治荒剔蠹討究儒術以興典憲薰醲涵浸殆百餘年其後文章稍稍可述至貞元元和間愈遂以六經之文爲諸儒倡障隄末流反剋以樸剗僞以真然愈之才自視司馬遷揚雄至班固以下不論也當其所得粹然一出於正刊落陳言橫驚別驅汪洋大肆要之無抵牾聖人者其

道蓋自比孟軻以荀況揚雄爲未淳寧不信然至進諫陳
謀排難卹孤矯拂媮末皇皇於仁義可謂篤道君子矣自
晉訖隋老佛顯行聖道不斷如帶諸儒倚天下正議助爲
怪神愈獨喟然引聖爭四海之惑雖蒙訕笑踰而復奮始
若未之信卒大顯於時昔孟軻拒楊墨去孔子纔二百年
愈排二家乃去千餘歲撥衰反正功與齊而力倍之所以
過況雄爲不少矣自愈沒其言大行學者仰之如泰山北
斗云

文錄序

趙德

昌黎公聖人之徒歟其文高出與古之遺文不相上下所
履之道則堯舜禹湯文武周孔孟軻揚雄所授受服行之

實也。固已不雜其傳。由佛及聃莊楊之言。不得干其思。入其文也。以是光於今。大於後。金石焦鑠。斯文燦然。德行道學。文庶幾乎古。蓬茨中手持目覽。飢食渴飲。沛然滿飽。顧非適諸聖賢之域。而謬志於斯。將所以盜其影響。僻處無備。得以所遇次之爲卷。私曰文錄。實以師氏爲請。益依歸之所云。

記舊本韓文後

歐陽文忠公

予少家漢東。漢東僻陋無學者。吾家又貧無藏書。州南有大姓李氏者。其子彥輔頗好學。予爲兒童時。多游其家。見其弊筐貯故書在壁間。發而視之。得唐昌黎先生文集六卷。脫略顛倒無次第。因乞李氏以歸。讀之。見其言深厚而

雄博然予猶少未能悉究其義徒見其浩然無涯若可愛
是時天下學者楊劉之作號爲時文能者取科第擅名聲
以誇榮當世未嘗有道韓文者予亦方舉進士以禮部詩
賦爲事年十有七試于州爲有司所黜因取所藏韓氏之
文復閱之則喟然歎曰學者當至於是而止爾因怪時人
之不道而顧已亦未暇學徒時時獨念于予心以謂方從
進士干祿以養親苟得祿矣當盡力於斯文以償其素志
後七年舉進士及第官于洛陽而尹師魯之徒皆在遂相
與作爲古文因出所藏昌黎集而補綴之求人家所有舊
本而校定之其後天下學者亦漸趨於古而韓文遂行于
世至于今蓋三十餘年矣學者非韓不學也可謂盛矣嗚

呼道固有行於遠而止於近有忽于往而貴于今者非惟世俗好惡之使然亦其理有當然者故孔孟惶惶於一時而師法於千萬世韓氏之文沒而不見者二百年而後大施於今此文非特好惡之所上下蓋其久而愈明不可磨滅雖蔽于暫而終耀于無窮者其道當然也予之始得於韓也當其沈沒棄廢之時予固知其不足以追時好而取勢利於是就而學之則予之所爲者豈所以急名譽而干勢利之用哉亦志乎久而已矣故予之仕於進不爲喜退不爲懼者蓋其志先定而所學者宜然也集本出於蜀文字刻畫頗精於今世俗本而脫繆尤多凡三十年間聞人有善本者必求而改正之其最後卷秩不足今不復補者

重增其故也。予家藏書萬卷，獨昌黎先生集爲舊物也。嗚呼韓氏之文之道，萬世所共尊，天下所共傳而有也。予於此本，特以其舊物而尤惜之。

潮州韓文公廟碑

蘇文忠公

匹夫而爲百世師，一言而爲天下法，是皆有以參天地之化，關盛衰之運，其生也有自來，其逝也有所爲矣。故申呂自嶽降，而傳說爲列星；古今所傳，不可誣也。孟子曰：吾善養浩然之氣，是氣也，寓於尋常之中，而塞乎天地之間，卒然遇之，則王公失其貴，晉楚失其富，良平失其智，賁育失其勇，儀秦失其辯，是孰使之然哉？其必有不依形而立，不恃力而行，不待生而存，不隨死而亡者矣。故在天爲星辰，

在地爲河嶽幽則爲鬼神而明則復爲人此理之常無足怪者自東漢以來道喪文弊異端並起歷唐貞觀開元之盛輔以房杜姚宋而不能救獨韓文公起布衣談笑而麾之天下靡然從公復歸于正蓋三百年於此文起八代之衰而道濟天下之溺忠犯人主之怒而勇奪三軍之帥此豈非參天地關盛衰浩然而獨存者乎蓋嘗論天人之辨以謂人無所不至惟天不容僞智可以欺王公不可以欺豚魚力可以得天下不可以得匹夫匹婦之心故公之精誠能開衡山之雲而不能回憲宗之惑能馴鱷魚之暴而不能弭皇甫鎛李逢吉之謗能信於南海之民廟食百世而不能使其身一日安於朝廷之上蓋其所能者天也

其所不能者人也。始潮人未知學。公命進士趙德爲之師。自是潮之士皆篤於文行。延及齊民。至于今號稱易治。信乎孔子之言。君子學道則愛人。而小人學道則易使也。潮人之事公也。飲食必祭。水旱疾疫。凡有求必禱焉。而廟在刺史公堂之後。民以出入爲艱。前守欲請諸朝。作新廟。不果。元祐五年。朝散郎王君滌來守是邦。凡所以養士治民者。一以公爲師。民旣悅服。則出令曰。願新公廟者。聽。民謹趨之。卜地於州之城南七里。期年而廟成。或曰。公去國萬里。而謫于潮。不能一歲而歸。沒而有知。其不眷戀于潮也審矣。軾曰。不然。公之神在天下者。如水之在地中。無所往而不在也。而潮人獨信之深。思之至。煮蒿悽愴若或見之。

譬如鑿井得泉而曰水專在是豈理也哉元豐七年詔封公昌黎伯故榜曰昌黎伯韓文公之廟潮人請書其事于石因爲作詩以遺之使歌以祀公其詞曰

公昔騎龍白雲鄉手抉雲漢分天章天孫爲織雲錦裳飄然乘風來帝旁下與濁世掃粃糠西游咸池略扶桑莫木衣被昭回光追逐李杜參翱翔汗流籍湜走且僵滅没倒景不可望作書詆佛譏君王要觀南海窺衡湘歷舜九疑弔英皇祝融先驅海若藏約束鮫鱷如驅羊釣天無人帝悲傷謳吟下招遣巫陽犧牲雞卜羞我觴於粲荔丹與蕉黃公不少留我涕滂翩然被髮下大荒

韓文集傳終

韓文遺集

聯句

有所思聯句

相思繞我心。日夕千萬重。年光坐婉晚。春淚銷顏容。郊臺
鏡晦舊暉。庭草滋新茸。望天山上石。別劒水中龍。愈

遣興聯句

我心隨月光。寫君庭中央。郊月光有持晦。我心安所忘。愈

常恐金石契。斷爲相思腸。郊平生無百歲。岐路有四方。愈

四方各異俗。適具非所將。郊驚蹄顧挫秣。逸翮遺稻粱。愈

時危抱獨沉。道泰懷同翔。郊獨居久寂默。相顧聊慨慷。愈

慨慷丈夫志。可以耀鋒鐸。郊遽寧知卷舒。孔顏識行藏。愈

朗鑒諒不遠。佩蘭永芬芳。郊苟無夫子聽。誰使知音揚。愈

贈劒客李園聯句

天地有靈術。得之者唯君。郊築爐地區外。積火燒氛氲。愈

照海鑠幽怪。滿空歆異氛。郊山磨電奕奕。水淬龍蜃蜃。愈

太一裝以寶。列僊篆其文。郊可用懾百神。豈惟壯三軍。愈

有時幽匣吟。忽似深潭聞。郊風胡久已死。此劒將誰分。愈

行當獻天子。然後致殊勲。郊豈如豐城下。空有斗間雲。愈

遺詩

同竇牟韋執中尋劉尊師不遇

秦客何年駐。僊源此地深。還隨躡舄騎。來訪馭風襟。院閉青霞入。松高老鶴尋。猶疑隱形坐。敢起竊桃心。

春雪

片片驅鴻急，紛紛逐吹斜。到江還作水，著樹漸成花。越喜飛排瘴，胡愁厚蓋砂。兼雲封洞口，助月照天涯。瞋見迷巢鳥，朝逢失轍車。呈豐盡相賀，寧止力耕家。

贈族姪

我年十八九，壯氣起曾中。作書獻雲闕，辭家逐秋蓬。歲時易遷欠，身命多厄窮。一名雖云就，片祿不足充。今者復何事，卑棲寄徐戎。蕭條資用盡，濩落門巷空。朝眠未能起，遠懷方鬱悰。擊門者誰子，問言乃吾宗。自云有奇術，探妙知天工。既往悵何及，將來喜還通。期吾語非佞，當爲佐時雍。

嘲鼾睡

澹師晝睡時。聲氣一何猥。頑颺吹肥脂。坑谷相崑磊。雄哮
乍咽絕。每發壯益倍。有如阿鼻尸。長喚忍衆罪。馬牛驚不
食。百鬼聚相待。木枕十字裂。鏡面生痍。肥音瘡鐵佛聞皺
眉。石人戰搖腿。孰云天地仁。吾欲責真宰。幽尋虱搜耳。猛
作濤翻海。太陽不忍明。飛御皆墮怠。乍如彭與黥。呼冤受
俎醢。又如圈中虎。號瘡兼吼餒。雖令伶倫吹。苦韻難可改。

雖令巫咸招。魂爽難復在。何山有靈藥。療此願與採。

澹公坐臥時。長睡無不穩。吾嘗聞其聲。深慮五藏損。黃河
弄瀆瀑。梗澀連拙鮫。南帝初奮槌。鑿竅洩混沌。迥然忽長
引。萬丈不可忖。謂言絕於斯。繼出方衮衮。幽幽寸喉中。草
木森莽。本音尊盜賊雖狡獪。亡魂敢窺闥。鴻蒙總合雜。詭

謫騁戾狠乍如鬪呶呶忽若怨懇懇賦形苦不同無路尋
根本何能埋其源惟有土一畚

晝月

玉盃不磨著泥土青天孔出白石補兔入臼藏蛙縮肚桂
樹枯株女閉戶陰爲陽羞固自古嗟汝下民或敢侮戲謔
盜視汝目瞽

贈張徐州莫辭酒

莫辭酒此會固難同請看工女機上帛半作軍人旗上紅
莫辭酒誰爲君王之爪牙春雷二月不作響戰士豈得來
還家

辭唱歌

抑逼教唱歌。不解看豔詞。坐中把酒人。豈有歡樂姿。幸有
伶者婦。腰身如柳枝。但令送君酒。如醉如憨癡。聲自肉中
出。使人能透隨。復遣慳慳者。贈金不皺眉。豈有長直夫。喉
中聲雌雌。君心豈無耻。君豈是女兒。君教發直言。大聲無
休時。君教哭古恨。不肯復吞悲。乍可阻君意。豔歌難可爲。
知音者誠希

知音者誠希。念子不能別。行行天未曉。攜手踏明月。

酬藍田崔丞立之詠雪見寄

京城數尺雪。寒氣倍常年。泯泯都無地。茫茫豈是天。崩奔
驚亂射。揮霍訝相纏。不覺侵堂陛。方應折屋椽。出門愁落
道。上馬恐平韉。朝鼓矜凌起。山齋酩酊眠。吾方嗟此役。君

乃詠其妍。冰玉清顏隔波濤。盛句傳朝飧。思共飯。夜宿憶同羣。舉目無非白。雄文乃獨玄。

潭州泊船呈諸公

夜寒眠半覺。鼓笛開嘈嘈。閤浪春樓堞。驚風破竹篙。主人看使範。客子讀離騷。聞道松醪賤。何須恡錯刀。

飲城南道邊古墓上逢中丞過贈禮部衛員外少室

張道士

偶上城南土骨堆。共傾春酒三五杯。爲逢桃樹相料音理。不覺中丞喝道來。

池上絮

池上無風有落暉。楊花暗後自飛飛。爲將纖質凌清鏡。濕

却無窮不得歸。

記

監軍新竹亭記

書

荅侯生問論語書

愈白。侯生足下。所示論語問甚善。聖人踐形之說。孟子詳於其書。當終始究之。若萬物皆備於我。反身而誠是也。苟有偽焉。則萬物不備矣。踐形之道。無他。誠是也。足下謂賢者不能踐形。非也。賢者非不能踐形。能而不備耳。形言其備也。所謂具體而微是也。充實之謂美。充實而有光輝之謂大。充實則具體。未大則微。故或去聖一間。或得其一體。

皆踐形而未備者。唯反身而誠。則能踐形之備者耳。愈昔
注解其書。而不敢過求其意。取聖人之旨而合之。則足以
信後生輩耳。此說甚爲穩當。切更思之。愈白。

墓誌

相州刺史御史中丞田公故夫人魏氏墓誌銘

啓

皇帝卽位賀宰相啓

愈啓。伏見冊命皇帝。以閏月三日。嗣臨大位。以主神人含
生之類。孰不蒙賴。相公翼亮聖明。大慶資始。伏惟永永與
國同休。愈下情不勝慶躍。限以所守。不獲隨例拜賀。謹差
其奉啓。不宣。謹啓。

狀

奏汴州得嘉禾嘉瓜狀

右謹按符瑞圖王者德至於地則嘉禾生伏惟皇帝陛下道合天地恩霑動植邇無不協遠無不賓神人以和風雨咸若前件嘉禾等或兩根並植一穗連房或延蔓敷榮異實共蒂旣叶和同之慶又標豐稔之祥感自皇恩微莖何極於造化親逢嘉瑞小臣喜遇於休明無任

皇帝卽位賀諸道狀

伏見勅命皇帝以閏正月三日嗣臨寶位海內惟新凡在臣庶不勝慶幸惟俯同下情未由拜賀但增馳戀謹奉狀不宣某再拜

皇帝卽位降赦賀觀察使狀

二月五日恩赦。今月二十四日卯時到州。當時集百官僧道百姓宣示訖。聖上以繼明之初。垂惟新之澤。曲成不遺於萬物。大賚遂延於四海。寰宇斯泰。品類皆蘇。握恩普霑。遠近同慶。愈以藩條有制。拜賀無由。不勝欣抃之至。謹差萍鄉縣丞李某奉狀陳賀。

潮州謝孔大夫狀

伏奉七月二十七日牒。以愈貶授刺史。特加優禮。以州小俸薄。慮有闕乏。每月別給錢五十千。以送使錢充者。開緘捧讀。驚榮交至。顧已量分。慚懼益深。欲致辭爲讓。則垂伏屬之禮。承命苟貪。又非循省之道。進退反側。無以自寧。其

妻子男女并孤遺孫姪奴婢等尚未到官窮州使賓罕至身衣口食絹米足充過此以往實無所用積之於室非廉者所爲受之於官名且不正恃蒙眷待輒此披陳

疏

憲宗崩慰諸道疏

愈言上天降禍大行皇帝奄棄萬國伏惟攀慕永痛哀感難勝某承詔不任號絕限以官守拜慰未由伏增惶戀謹差某奉疏不宣韓愈再拜

題名

長安慈恩塔題名

韓愈退之李翱翔之孟郊東野柳宗元子厚石洪濬川同

登

洛北惠林寺題名

韓愈李景興侯喜尉遲汾貞元十七年七月二十二日魚
于溫洛宿此而歸昌黎韓愈書

謁少室李渤題名

愈同樊宗師盧仝謁少室李拾遺

福先塔寺題名

處士石洪濬川吏部員外王仲舒弘中水部員外鄭楚相
叔敖洛陽縣令潘宿陽乾明國子博士韓愈退之前試左
武衛曹李演廣文前杭州錢塘縣尉鄭紘文明元和三
年十月九日同遊

嵩山天封宮題名

元和四年三月二十六日，與著作佐郎樊宗師處士盧仝，自洛中至少室，謁李徵君渤，樊次玉泉寺，疾作歸，明日遂與李盧道士韋濛僧榮並少室而東，抵衆寺，上太室中峰，宿封禪壇下石室，遂自龍泉寺釣龍潭水，遇雷，明日觀啓母石，入此觀，與道士趙玄遇，乃歸。閏月三日，國子博士韓愈題。

歐公集古跋尾云：右韓退之題名二，皆在洛陽。其一在嵩山天封宮石柱上刻之，記龍潭遇雷事。天聖中，余爲西京留守，推官與梅聖俞遊嵩山，入天封宮，徘徊柱下而去，遂登山頂之武后封禪處，有石記戒人遊龍潭者。

母語笑以黷神龍。龍怒則有雷。恐因念退之記遇雷意。其有所誠也。其一在福先寺塔下。當時所見墨蹟。不知其後何人模刻于石也。

迂杜兼題名

河南尹水陸運使杜兼。尚書都官員外郎韓愈。水陸運判官洛陽縣尉李宗閔。水陸運判官伊闕縣尉牛僧孺。前同州韓城縣尉鄭伯義。元和四年九月二十二日。大尹給事奉詔祠濟瀆。回愈與二判官。於此迎候。遂陪遊宿。愈題。

華嶽題名

淮西宣慰處置使門下侍郎平章事裴度。副使刑部侍郎兼御史大夫馬總。行軍司馬太子右庶子兼御史中丞韓

愈判官司勲員外郎兼侍御史李正封都官員外郎兼侍
御史馮宿掌書記禮部員外郎兼侍御史李宗閔都知兵
馬使左驍衛將軍威遠軍使兼御史大夫李文悅左廂都
押衙兼都虞候左衛將軍兼御史中丞密國公高承簡元
和十一年八月丞相奉詔平淮右八日東過華陰禮于嶽
廟總等八人實備將佐以從



韓文遺集終

天保十年刊
嘉永七年重刊

